


Unsa Man Ang Espiritu Santo?

 . . . halos para sa usa ka panagtigum. Kini nga panagtigum mamahimong medyo mas lahi kaysa sa kasagaran natong ginabuhat dinhi. Kasagaran, sa matag higayon nga kita nanag-uban dinhi, kini usa ka panagtigum nga . . . alang sa pagpang-ayo sa mga masakiton ug alang sa pisikal nga mga panginahanglanon. Kini mao ang kasagarang gihatagan og kabug-aton. Apan karong gabhiona atong sugdan kining rebaybal alang sa pag-ayo sa kalag, ang—ang espiritu sa tawo.

Apan, kon itugot sa Ginoo, sa Dominggo sa buntag, sa Sunday school, Dominggo sa buntag, kita adunay pagpangamuyo alang sa mga masakiton ug usa ka regular nga pila para sa pagpang-ayo, sa Dominggo sa buntag, kon itugot kini sa Ginoo. Ug niining mga gabii sa semana, kita’y napugos gayud sa paghisgot mahitungod sa mga butang nga Walay Katapusan alang sa—sa kalag.

² Karon, nasayod kita nga kung ang usa ka—ang usa ka lawas naayo, kana makapalipay kanatong tanan, tungod kay nahibalo kita nga kini nagapakita gayud nga ang atong Diyos nagaayo sa mga masakiton. Apan ang masakiton nga tawo, bisan sila mabuhi pa og hataas, tingali magmasakiton pag-usab, sa mao gihapong sakit nga sila naayo kaniadto, ug kana dili makalimod sa maong pagkaayo. Ang doktor maghatag og tambal alang sa pulmonya, ug tingali paglabay sa duha ka adlaw mamatay sila tungod sa pulmonya human nga gipahayag sa doktor nga siya naayo na. Mibalik kini pag-usab. Apan kon kanang kalag naayo, nan aduna na, diha kanimong, ang Kinabuhing Eternal.

³ Ug ako nagatoo nga kita haduol na kaayo sa Pagbalik ni Ginoong Jesus, maong kinahanglan natong buhaton ang tanan kutob sa atong mahimo aron madala ang matag kalag ngadto sa Gingharian, ug madala ang Gingharian ngadto sa mga tawo, aron ang atong mga espiritu mamaayo. Ako nagatoo nga ang lawas ni Jesus mao ang labing masakiton nga lawas nga akong nahibaloan; kana, ang—ang lawas, espirituhanong lawas ni Cristo dinhi sa yuta, nga masakiton kaayo.

⁴ Bueno, wala kami nagplano nga langanon kamo pag-ayo niining gabhiona, tungod niadtong unang gabii wala na kita’y mapalingkoran sa atong minahal nga mga higala. Anaa kita’y plano sa pagpatukod ug bag-ong simbahan, usa ka dako nga tabernakulo dinhi mismo niining mga loteha, o bisan asa man

kita pangunahan sa Ginoo; apan kutob sa atong nahibaloan, dinhi ra.

⁵ Ug karon ato nang napahibalo ang panagtigum, nga Miyerkules hangtud sa Dominggo. Apan sa Dominggo, paingon na kini sa bakasyon sa Kapaskuhan, apan kini... sa matag higayon nga ang Ginoo mosulti kanato sa paghunong, mao na gyud kana nga takna. Wala pa kami mahibalo kung unsa ang mga sangputanan. Apan nagatoo kita nga ang mga miyembro dinhi sa tabernakulo ug ang atong kabanay nga mga iglesia (nga, ang usa kanila mao ang—mao ang holiness tabernacle sa Utica, nga si Igsoong Graham Snelling mao ang pastor, ug sa New Albany diin si Igsoong—Si Igsoong Junie Jackson ang pastor, maingon usab didto sa highway diin si Igsoong Ruddell mao ang pastor), kita ug sila, mga kabanay nga iglesia sa niining tabernakulo, naningkamot kita nga madala ang... ang atong mga miyembro ngadto sa mas maayong pagpakig-fellowship kang Cristo. Mao kana ang atong katuyoan. Mao nga gipili nako nga magbasa ug magtudlo, sa pipila ka sunod nga mga gabii...

⁶ Karong gabhiona buut nakong mamulong sa hilisgotan mahitungod sa: *Unsa Man Ang Espiritu Santo?* Ug ugma sa gabii, buut nakong magwali mahitungod sa: *Alang Sa Unsa Nga Kini Gihatag?* Ug sa Biyernes sa gabii... Ug, sa mga naga-rekord, dili ko gusto kining marekord sa Biyernes sa gabii: *Sa Unsaang Paaqi Nako Mabaton Ang Espiritu Santo?* ug *Unsaon Nako Pagkahibalo Kung Nabaton Na Nako Kini?* Dayon ato lamang tugotan, ug atong tan-awon kung asa kita dalahon sa Ginoo, sa Sabado ug Dominggo. Ug sa Dominggo sa buntag, usa kini ka panerbisyo alang sa pagpang-ayo, ug usa na usab ka panerbisyo sa pag-ebanghelyo pagka Dominggo sa gabii.

⁷ Ug busa buut natong mahibaloan kana sa tanan... Ug nahibalo ko nga ang mga tigrekord naga-rekord dinha sa luyo nga lawak, ug buut natong isulti kini. Tungod, sa mga panagtigum nga sama niini, ingon nga pang-ebanghelyo nga matang, aduna kita'y mga mananambong nga gikan pa sa nagkalain-laing kasimbahanang denominasyon nga natudloan na diha sa ilang kaugalingong pagtulon-an, ang matag usa kanila. Ug okey ra kana. Dili gyud ko gusto nga masad-an sa pagpugas og panagsumpaki taliwala sa mga kaigsoonan. Ug bisan diha sa mga panagtigum, ang dakong ebanghelikong Kamatuoran lang sa Kasulatan ang ginawali ko, kung unsa ang ginatoohan sa mga igsoon nga nagapasiugda sa akong panagtigum. Apan, dinhi sa tabernakulo, ako—Gusto kong isulti kung unsa ang atong ginatoohan. Busa, kung kamo—kung dili ninyo kini masabtan, malipay ko nga makadawat og gamay nga sulat o mubong sulat gikan kaninyo, aron ipangutana sa ako kon ngano—kon nganong ingon-ana man ang ginatoohan nato. Ug malipay ako nga sulayan nga ipasabot kini kutob sa akong mahimo.

⁸ Kabalo mo, ang matag iglesia, kung wala ka'y doktrina, dili ka matawag nga iglesia. Kinahanglan nga aduna ka'y usa ka butang nga imong gibarugan, pipila ka mga prinsipyo nga imong gihuptan. Ug bisan asa pa konektado ang usa ka tawo o unsa siya nga denominasyon, kung kana nga tawo natawo sa Espiritu sa Dios, kana akong igsoong lalaki o igsoong babaye, bisan unsa pa'y...Bisan magkalahi pa kita sa ubang mga butang, sama sa kung unsa kahalayo ang sidlakan gikan sa kasadpan, apan managsoon gihapon kita. Ug wala ko'y buhaton nga bisan unsa man gawas sa tabangan ang maong igsoon para sa mas haduol, mas maayong pagkinabuhi kang Cristo. Ug ako nagatoo nga ang si kinsa man nga tinuod, matuod nga Cristohanon ingon niana usab ang iyang buhaton kanako.

⁹ Karon, gihangyo ko kini nga tabernakulo...Karon, wala kita nagasulod dinhi para sa usa ka hataas nga panagtigum. Gusto ko nga sa pagsulod ko dinhi, ug gusto ko usab kamo, ug gihangyo kamo, nga sunogon n'yo ang matag tulay sa likod n'yo, ug itul-id ang matag sala, ingon nga nagasulod kita dinhi uban sa tibuk natong kasingkasing ug sa tibuk natong kinabuhi. Kinahanglan nagatambong kita dinhi nga ang katuyoan lamang mao ang pag-andam sa atong mga kalag alang sa Pagbalik sa Ginoo, ug wala na'y laing uban pang katuyoan. Ug sama sa akong gisulti na ug giingon, nga tingali usahay ako makapanudlo o makapamulong og butang nga medyo supak sa uban, sa kung unsa ang ilang gitooan. Ako—ako—wala ako mianhi alang sa kontrobersiya, nakita n'yo, ako—mianhi ko... Nagatambong kita dinhi aron mag-andam sa Pagbalik sa Ginoo. Ug sa akong pagtoo kining gamay nga grupo...

¹⁰ Aduna ko'y kauban nga mga nagbisitang mga kaigsoonan dinhi nga mga kaila ko, gikan sa lainlaing mga lugar, ug nalipay kita nga ania sila. Ug walay pagduhaduha nga aduna usab sa mga mananambong dinha, adunay uban nga mga gikan pa sa gawas sa lungsod, ug gikan sa mga silingan nga mga siyudad. Ug nalipay kami nga ania kamo, ug mapasalamaton gayud kami tungod kaninyo, nga gihigugma ninyo kami pag-ayo nga nanagtambong gyud kamo aron maminaw niining mga butang. Dios... Hinaut nga inyong madala sa inyong panimalay, akong igsoong lalaki, ug igsoong babaye, ang labing adunahan nga mga bahandi nga mahimong ibubo sa Dios nganha sa inyong kasingkasing, maoy akong pag-ampo.

¹¹ Ug sa niining gamay nga tabernakulo, ingon nga ako nagatoo gyud nga usa sa mga labing maayong mga tawo nga ania karon sa yuta, nagatambong niini nga tabernakulo. Bueno, ako wala nag-ingon nga "tanang" nga labing maayo nga mga tawo. Ang giingon ko nga pipila sa labing maayong mga tawo sa yuta nagatambong niini nga tabernakulo. Apan sa adlaw-adlaw, sa pagbalik-balik ko dinhi, matag tigum, nakita nako ang usa ka dako nga panginahanglan niini nga tabernakulo, usa ka dako

nga panginahanglan niini, ug kana alang sa usa ka pagpuno, o usa ka pagpahinungod, usa ka mas lawum nga pagkinabuhi, usa ka mas duol nga paglakaw uban sa Dios. Ug ako nagsaad kanila sa pagbuhat niini, nga ihatud kini nga Mensahe kanila. Ug nalipay kami sa pag-abi-abi kaninyo ug sa inyong pagpakig-fellowship kanamo palibot sa Pulong sa Dios, samtang kami nagatudlo ug nagapaningkamot nga magpahayag.

¹² Bueno, sa unang tulo ka gabii dili kita magkuha og usa ka hilisgotan nga igawali, apan usa ka Mensahe nga itudlo gikan sa Pulong sa Dios.

Ug karon, kay, dili ko mohangyo kang bisan kinsa sa pagbuhat og bisan unsa nga ako mismo dili nako buhaton. Ug kini nga semana nahimong usa ka hingpit nga Kalbaryo alang kanako. Hapit kaayo ko—mawad-an og panimuot, sa akong pagtoo, hangtud nga halos wala na ako sa akong kaugalingon. Apan hingpit nakong gitugyan ang tanang kabubut-on, ug ang tanan nga akong nahibaloan, ngadto sa Ginoo.

¹³ Niadtong miaging gabii, sa mga lagpas na sa tungang gabii, ako ug akong asawa, ingon nga mata pa, ug nagaampo ug nakigsulti sa Ginoo, nanagluhod diha sa gamay nga bangko sa . . . among atubangan nga kwarto, uban sa duha ka abli nga Biblia, among gipahinungod pag-usab ang among kaugalingon ngadto sa Dios, alang sa usa ka bug-os nga pag-alagad, nga among itugyan ang among kaugalingong mga kabubut-on, ug tanan na, ug ang matag negatibo nga panghunahuna, ug aron alagaron ang Ginoong Jesus.

Ug nagasalig ako nga ingon niana ang inyong panghunahuna, usab, nga ingon niana usab ang inyong gibuhat. Unya sa pag-anhi nato karong gabhiona, nagaanhi kita sa balaan nga mga dapit, taliwala sa tawo nga nagaampo, ug nagapuasa, ug nagahimo og mga pagpasig-uli, ug nagaandam nga makadawat og usa ka butang gikan sa Dios. Ug nasayod ako nga ang moanhi nga gutom dili gayud muoli nga gutom, kondili pagapakan-on siya sa Dios og Tinapay sa Kinabuhi.

¹⁴ Karon, sa dili pa kita magabasa gikan sa Iyang sagradong Basahon, iduko nato ang atong mga ulo sa makadiyut alang sa pag-ampo.

¹⁵ Ginoo, aduna na'y pag-ampo nga gihalad dinhi niining dapita karong gabhiona. Aduna na'y . . . mga alawiton sa Sion nga giawit na sa Imong mga anak. Ngani nadasig ang ilang mga kasingkasing. Ug mianhi kami aron sa paghalad sa among kaugalingon nganha Kanimo, ug sa pagsimba Kanimo gikan sa kahiladman sa among kalag. Ug ginapahinumdam namo kini sa Imong panumduman, Ginoo, nga nag-ingon Ka niadtong milingkod Ka sa bukid ug nagtudlo Ka sa Imong mga tinunan, “Bulahan ang mga gigutom ug giuhaw sa katarungan, kay sila pagabusgon.” Gisaad Mo kini, Ginoo. Nagaduol kami karong

gabhiona nga abli ang mga kasingkasing. Nagaanhi kami, nga gigutom ug giuhaw, ug nasayod kami nga tumanon Mo ang Imong saad.

¹⁶ Samtang kami naninguha sa pag-abli niining sagrado nga mga panid sa Biblia, aron basahon ang sulod Niini, hinaut nga ihatud Kini sa Balaang Espiritu ngadto sa matag kasingkasing. Ug hinaut nga kana nga Binhi mahulog ngadto sa lawum, madagayaon nga pagtoo aron ipamunga ang matag saad nga gisaad sa Pulong. Dungga kami, Ginoo, ug hinloi kami, ug sulayi kami. Ug kon adunay unsa man nga mahugaw'ng butang kanamo, Ginoo, aduna ma'y sala nga wala pa nahisugid, o bisan unsa nga dili matarung, padayag kini karon mismo, Ginoo, aron pangayoan kini og pasaylo ug magalakaw kami nga nangatulid na, kay naamgo namo nga kami nagakinabuhi na ilalum sa landong sa Pagbalik ni Ginoong Jesus. Ug kami, Oh Balaan nga Dios, nagapailalum sa mga landong sa Imong—sa Imong hustisya karong gabii, ug kami nangamuyo alang sa usa ka bag-ong dedikasyon, ug pagpahinungod, ug pagpuno sa Balaang Espiritu sa among kinabuhi.

¹⁷ Makita namo nga ang kalayo sa rebaybal nagsugod na sa pagkapalong, itugot nga magasugnod kami'g kahoy sa Pulong, aron Kini makapasiga na usab ug bag-ong kalayo, nga ang among mga kasingkasing mapuno sa kadasig. Balaana kami, Ginoo, pinaagi sa Imong bililhong Pulong ug Imong Dugo, ug sa Imong grasya, kami nangamuyo. Ug Kanimo ang tanang pagpasalamat ug pagdayeg. Tangtanga ang tanang pagpihig gikan sa among mga kasingkasing. Limpyohi kami, Oh Ginoo. Hatagi kami ug putli nga kasingkasing, ug limpyo nga mga kamot, ug limpyo nga panghunahuna, aron kami makasulod sa Imong santuwaryo, sa matag gabii, nga nagamaya ug puno sa Imong Espiritu. Amo kining ginapangamuyo sa Ngalan ni Jesus, ug alang Kaniya. Amen.

¹⁸ Gusto ko basahon ang Pulong karon. Ug samtang... Ginahangyo ko kamo nga kuhaon inyong mga Bibliya, inyong mga lapis, ug inyong mga papel, para sa mga Kasulatan. Kung gusto ninyo kana, maayo kaayo. Ug karon samtang nagaadto mo sa ika-7 nga kapitulo sa Mga Buhat, sa pagsugod; sa pagtubag sa pangutana, o sa pagsugod sa pagtubag sa pangutana: *Unsa Man Ang Balaang Espiritu?*

¹⁹ Walay laing makapildi kang Satanas, wala gyu'y laing butang sa yuta nga makapildi kang Satanas, sama sa Pulong sa Dios. Gigamit Kini ni Jesus sa Iyang dakung pagpakiggubat; Ingon Siya, "Kini nahisulat. . ."

²⁰ Ug karong buntag, nakapaminaw ko, mga pila na ka adlaw ang milabay, sa usa ka sibya nga mora'g gustong isulti nga ang kabuhatan kono gikan lang sa pipila ka mga abo nga nahiusa, ug pipila ka phosphate, ug pipila ka mga kemikal sa yuta, ug ang init kono sa sanag sa adlaw maoy nagmugna sa kagaw

sa kinabuhi ug nagpatungha sa kinabuhi. Pagkakataw-anan gyud! Sa dihang, ang sanag sa adlaw mao ma'y mopatay sa bisan unsang kagaw sa kinabuhi. Sige ibulad ang kagaw diha sa init sa adlaw, patyon niini kini sa gilayon. Wala'y ingon ana nga butang; pero gapaninguha si Satanas nga ipilit gyud kana kanako. Ug human nako mahatud ang akong gamay'ng si Rebekah sa eskwelahan ganihang buntag, ug sa pagbalik ko, giablihan nako pag-usab ang radyo; ug akong hunahuna nga basin mao na sàb ang akong mapaminawan, mao'ng gipalong ko na lang kini'g balik.

Ug samtang nagabiyaha ko diha sa dalan, miingon si Satanas kanako, ingon siya, "Nahibalo ka ba nga kining Tawo nga imong gitawag og Jesus usa lamang ka tawo nga sama sa uban, ngadtong sa Iyang panahon, sama ni Billy Graham o Oral Roberts? Usa lamang Siya ka tawo nga adunay pipila ka mga tawo nga nagsugod og tapok diha Kaniya ug nag-ingon nga Siya usa ka halangdon nga Tawo, ug nga wala madugay Siya nahimong mas bantugan pa, ug unya Siya nahimong usa—usa na ka dios ngadto kanila. Ug karon kini mikaylap na sa tibuk kalibutan, sukad nga Siya namatay, ug mao na kana."

²¹ Sa akong hunahuna, "Grabe ka ka bakakon!" Ug dayon miliko ko pagtabok ko sa Graham Street. Ingon ko, "Satanas, ikaw nga nakigsulti sa akong konsensya, gusto kong mangutana kaniyo og pipila ka mga butang: Kinsa diay kadtong giingon sa Hebreohanong mga propeta nga magaabot? Kinsa diay kadtong dinihogang Mesiyas? Unsa ma'y anaa niadtong mga tawhana nga nakita na Siya ug gipanagna ang Iyang kinabuhi, liboan ka tuig nga wala pa Siya miabot dinhi? Kinsa man kadtong nanaganagna niini nga eksaktong nangatuman sumala sa nahisulat mismo? Ug sa pag-abot Niya, sila miingon, 'Giisip Siya uban sa mga malinapason,' ug tuod ingon niana Siya. 'Siya gisamaran tungod sa atong mga kalapasan,' ug tuod nasamdan Siya. 'Gibuhat Niya ang Iyang lubnganan uban sa mga dato, apan nabanhaw Siya, sa ikatulo ka adlaw,' ug Siya nabanhaw gayud. Ug dayon gisaad Niya ang Espiritu Santo, ug nadawat ko Kini. Busa maayo pa nga mopahilayo ka Niini, tungod kay nahisulat kini sa Pulong, ug ang matag Pulong tinuod." Dayon mibiya siya. Basta ihatag lang kaniya ang Pulong, kana lang ang makapildi kaniya. Dili niya maagwanta kanang Pulong, kay Kini dinihogan man.

Magsugod kita sa pagbasa karong gabhiona sa ika-7 nga kapitulo sa Basahon sa Mga Buhat.

Ug miingon ang labawng sacerdote, Matuod ba kining mga butanga?

Ug siya miingon: Mga igsoon ug ginikanan, magpatalinghug kamo; Ang Dios sa kahimayaan mitungha ngadto sa atong amahan nga si Abraham, sa

didto pa siya sa Mesopotamia, sa wala pa siya magpuyo sa Haran,

Ug miingon kaniya, Pumahawa ka sa imong yuta ug sa imong kaubanan, ug umari ka sa yuta nga itudlo nako kanimo.

Unya mipahawa siya sa yuta sa mga Caldeahanon, ug mipuyo sa Haran: ug gikan didto, sa pagkamatay sa iyang amahan, gipabalhin siya sa Dios niining yutaa, nga ginapuy-an ninyo karon.

Ug siya wala niya paghatagi ug kabilin, niini, bisan na lamang ang pagatumban sa iyang tiil: apan gisaaran siya nga igahatag kaniya kini aron mahimong kaugalingon, ug sa iyang kaliwatan sa ulahi niya, sa wala pa siyang anak.

. . . Nagsulti ang Dios sa ingon niini, Nga ang iyang kaliwatan mga dumuloong sa laing yuta; ug maulipon sila, ug pagadaugdaugon sila sa sulod sa upat ka gatus ka tuig.

Ug pagahukman ko ang nasud nga magaulipon kanila, nagaingon ang Dios: ug sa human niini mamahawa sila, ug magaalagad kanako niining yutaa.

Ug iyang gihatagan siya sa tugon sa circuncision: ug mao kining pagpanganak ni Abraham kang Isaac ug gicircuncidahan niya sa ikawalo ka adlaw; ug si Isaac nanganak kang Jacob; ug si Jacob nanganak sa napulo ug duha ka patriarca.

²² Niining dapita, gusto natong hisgotan kining hilisgotan, nga sa akong hunahuna importanteng hilisgotan karon, mahitungod sa . . . *Unsa Man Ang Balaang Espiritu?* Unsa man Kini? Ug, karon, ang hinungdan nga akong gipili kining hilisgotan nga ingon niini, tungod dili ka makaduol ug makadawat sa Balaang Espiritu gawas kon hingsayran nimo kung unsa Kini. Ug dili nimo Kini madawat, bisan pa nga nahibaloan na nimo kung unsa Kini, gawas kon motoo ka nga gihatag Kini kanimo, ug para Kini kanimo. Ug, ngani, dili nimo mahibaloan kung nadawat mo na ba Kini, o wala, gawas kon nasayod ka sa mga resulta nga hatud Niini. Busa pag nahibalo ka kung unsa Kini, ug para sa kung kinsa Kini, ug kung unsay mga buhat Niini pagnagaabot Kini, nan mahibaloan mo kung unsa ang naangkon mo pagnadawat mo Kini. Kita n'yo? Mao kana'y mosulbad niana.

²³ Sama lamang sa akong pakig-istorya sa atong Igsoong Jeffries karon, ug siya miingon, “Gusto kong motambong unta sa panagtigum karong gabhiona, apan ugma pa ko sa gabii moanha.” Wala siya mahibalo nga nagapadayon na ang panagtigum, tungod wala man gud namo kini naipahibalo; diri lang gayud. Ang pipila sa mga . . . Si Igsoong Leo ug sila nagsulat

ug gipahibalo sa pipila sa atong mga higala, nga tua sa gawas sa lungsod. Bueno, tungod wala man pud ta'y igong lugar.

²⁴ Dayon ingon ko, “Igsoong Jeffries, kung imo kong ipadala aron paandaron ang usa sa imong mga poso sa petrolyo, nga wala gyud ko'y nahibaloan mahitungod ana, tingali ako pa kanang mapabuto. Basin sayup pa nga balbula ang akong matuyok o sayup nga makina ang akong mapaandar. Kinahanglan kong mahibaloan kung unsaon kini pagbuhat adisir ko magpaandar.”

Ug ingon niana usab sa pagdawat sa Espiritu Santo. Kinahanglan usá nimong masayran kung para sa unsa ang imong pag-anhi, ug kung unsaon pagdawat Niini, ug kung unsa Kini.

Bueno, una, gisaad na daan ang Balaang Espiritu.

²⁵ Mahimong magkinahanglan kita og napulo ka semana ug dili gayud. . . taphaw ra ang mahisgotan nato niining hilisgotan, bahin sa kung unsa gyud ang Balaang Espiritu. Apan, una sa tanan, gusto nakong hisgotan kini sa igong paagi aron mahatag ang outline niini matag gabii, dayon tan-awon nato kung aduna ba'y mga pangutana pagkasunod nga gabii.

²⁶ Pila man ang ania karon nga wala pa makadawat sa Espiritu Santo, wala pa nabautismohan sa Espiritu Santo? Ipataas ang inyong mga kamot, nahibalo ka nga wala ka pa nakadawat. Tan-awa ra ang mga kamot.

Bueno gusto kong hisgotan Kini, ingon nga ang Balaang Espiritu usa ka timailhan, kay Kini usa ka ilhanan. Hingsayran nato nga—nga ang tanang mga saad gihatag kanato pinaagi ni. . . ni Abraham nga mao ang amahan sa saad, tungod kay gihatag man sa Dios ang saad kang Abraham ug sa iyang Kaliwat sunod kaniya. Ang saad gihimo “kang Abraham ug sa iyang Kaliwat.” Ug kini nga ilhanan alang sa usa ka katawhan sa pakigsaad.

²⁷ Karon, adunay dakong kalainan tali sa usa lamang ka Cristohanon ug usa ka Cristohanon nga puno sa Espiritu Santo. Ug karon ato kining kuhaon gikan sa Kasulatan, ug ipahimutang sa eksakto gayud diha sa Kasulatan. Una, adunay Cristohanon nga nagaangkon nga siya usa ka Cristohanon. Apan kung kini nga Cristohanon wala pa mapuno sa Espiritu Santo, siya anaa pa sa proseso sa pagka-Cristohanon. Kita n'yo? Siya nagaangkon nga nagatoo Niini; ngani iya Kining ginapaninguha, apan wala pa gihatag sa Dios kaniya kining Espiritu, ang Espiritu Santo. Wala pa niya nakab-ot ang maong tinguha uban sa Dios, nga kini maila sa Dios.

²⁸ Tungod, nga, ang Dios naghimo ug usa ka pakigsaad kang Abraham, human nga Iyang gitawag si Abraham, nga maoy tipo sa pagtawag sa magtotoo sa karong panahon.

Iyang gitawag si Abraham, ug si Abraham mihawa sa iyang nasud ug miadto sa usa ka langyaw nga lugar, aron mopuyo

uban sa mga langyaw nga katawhan, ug kana'y usa ka tipo sa dihang ang Dios ginatawag ang usa ka tawo aron hunongon na ang iyang pagkadautan, maghinulsol sa iyang sala. Dayon iyang ginatalikdan ang iyang mga kaubanan, aron magpuyo uban ang bag-ong kaubanan, taliwala sa bag-ong matang sa mga tawo.

Ug dayon human nga nakita sa Dios si Abraham nga matinumanon sa saad nga gihatag Niya kaniya, nga makabaton siya og anak, nga pinaagi niini nga bata ang tibuk kalibutan mapanalanginan, nan gipamatud-an sa Dios ang iyang pagtoo pinaagi sa paghatag kaniya og usa ka ilhanan, ug kadto nga ilhanan mao ang sirkunsisyon. Ug ang sirkunsisyon usa ka tipo sa Balaang Espiritu.

²⁹ Anaa kini mismo sa sunod nga mga bersekulo sa niining kapitulo nga bag-o pa lang natong nabasa, kung gusto ninyo kining isulat. Ug ang . . . Si Esteban miingon, diha sa ika-51 nga bersekulo:

Kamo nga mga magahi ug liog . . . mga dili sinircuncidahan sa kasingkasing ug sa mga igdulungog, nagabatok kamo gihapon sa Espiritu Santo: sama sa gibuhat sa inyong mga ginikanan, mao usab ang gibuhat ninyo.

³⁰ Ang sirkunsisyon usa ka tipo sa Balaang Espiritu. Ug gihatag sa Dios kang Abraham ang—ang ilhanan nga mao ang sirkunsisyon human nga gidawat niya ang Dios sa saad Niini ug miadto siya sa lugar nga dili siya taga-didto. Kita n'yo? Usa kadto ka ilhanan.

Ug ang tanan niyang mga anak, ug ang iyang kaliwat sunod kaniya, kinahanglan aduna niini nga ilhanan sa ilang lawas, tungod usa kadto ka timailhan nga lahi sila. Mao kadto ang magpalahi kanila gikan sa tanang uban pang mga katawhan, kining ilhanan nga sirkunsisyon.

³¹ Ug mao kana ang gigamit sa Dios karon. Kini ang ilhanan sa pagsirkunsisyon sa kasingkasing, ang Espiritu Santo, mao kana ang nagapahimo sa Iglesia sa Dios nga usa ka gihimulag nga Iglesia gikan sa tanang uban pang mga kredo, mga pagtulonan ug mga denominasyon. Anaa sila sa tanan na nga matang sa mga denominasyon, apan bisan pa niana usa sila ka gilain nga katawhan. Kung ipa-estorya n'yo ako sa usa ka tawo sulod sa duha ka minuto, masulti ko kaninyo kung nadawat ba niya ang Espiritu Santo o wala; mabuhat n'yo usab kana. Kini ang nagapahimulag kanila. Usa Kini ka marka. Usa Kini ka ilhanan. Ug ang Balaang Espiritu usa ka ilhanan. Ug kini'y . . .

Ang si bisan kinsa nga bata nga nagdumili sa pagpasirkunsisyon sa Daang Tugon, nga usa ka paghulagway nang daan mahitungod sa Espiritu Santo, gihinginlan gikan sa iyang katawhan. Dili siya mahimong makigtigum uban sa kongregasyon, kon nagdumili siya sa pagpasirkunsisyon.

Kana iaplikar nato kana sa karon. Ang usa ka tawo nga modumili sa pagdawat sa bautismo sa Espiritu Santo, dili mahimong makipag-fellowship uban niadtong adunay Espiritu Santo. Dili kana nimo mahimo. Kay kinahanglan kang mamahimong usa ka kinaiyahan. Ingon, kini'y . . .

³² Ang akong inahan nagaingon kaniadto, “Ang mga langgam nga pareho’g balahibo nagapundok nga magkauban.” Bueno, usa kini ka karaan na nga panultihon, apan tinuod kini. Dili nimo makita ang mga salampati ug mga uwak nga magkauban nagapakig-fellowship. Magkalahi man gud ang ilang ginakaon. Magkalahi ang ilang batasan. Magkalahi ang ilang mga tinguha.

Ug ingon niana usab sa kalibutan ug sa usa ka Cristohanon *pagnasirkunsisyon* ka na sa Espiritu Santo, nga ang buot pasabot, “ang pagputol og unod.”

³³ Ang sirkunsisyon mahimo lamang sa lalaki. Apan kon ang babaye maminyo sa usa ka lalaki, siya kabahin na kaniya, mao nga siya nasirkunsisyon na uban kaniya. Nahinumdom kamo, diha sa Timoteo, diin Kini nag-ingon dinha, “Apan ang babaye maluwas pinaagi sa iyang pagpanganak, kung magpadayon siya sa pagtoo, ug sa pagkabalaan nga may kaligdong.”

³⁴ Karon, ang sirkunsisyon. Kabalo mo nga niadtong . . . Mikatawa si Sarah didto sa sulod sa balongbalong, tungod sa mensahe sa Anghel, sa dihang Siya miingon, “Abraham,” nga wala gani makaila kang Abraham, tungod usa Siya ka estranghero, “hain ang imong asawa, nga si Sarah?” Giunsa Niya pagkahibalo nga siya adunay asawa?

³⁵ Sama sa giingon ni Jesus, “Sama sa nahitabo sa mga adlaw ni Lot, mao usab ang mahitabo sa pag-abot sa Anak sa tawo.” Hinumdumi, kadtong mga ilhanan wala gihatag ngadto sa Sodoma ug Gomorra, sa kalibutan, sa mga relihiyonista. Apan gihatag kadto sa Pinili, sa mga tinawag. Ug si Abraham tinawag pagawas kaniadto. Ug ang pulong nga *iglesia* nagapasabot nga “mga tinawag; ang mga gihimulag,” sama kang Abraham nga gihimulag ang iyang kaugalingon ug nagpasirkunsisyon.

Ug sa dihang mikatawa si Sarah sa mismong mensahe sa Anghel, mahimo siya kaniadtong patyon sa Dios dihadiha; apan dili Niya mahimong pasakitan si Sarah nga dili pasakitan si Abraham, tungod kay sila usa ra. Si Sarah kabahin man ni Abraham. “Dili na kamo duha, kondili usa.”

³⁶ Busa, ang sirkunsisyon, ang Espiritu Santo sa karong panahon nagasirkunsisyon sa kasingkasing. Ug usa kini ka ilhanan, usa ka gihatag nga ilhanan.

Adunay miingon niadtong miaging adlaw . . . Balikon ko lang kini, nga dili isip usa ka kumedyas. Tungod, kamatuoran man kini, apan kini mora’g usa ka kumedyas. Sama sa kanunay ko nang gisulti, dili kini lugar alang sa mga pagkumedyas. Adunay usa ka Aleman didto sa West Coast, kon diin didto kami bag-

ohay lang. Nakadawat siya sa Espiritu Santo. Ug milakaw siya didto sa dalan, ug molakaw siya og gagmay, ug iyang ibayaw ang iyang mga kamot ug magsulti og mga laing pinulongan. Ug modalagan siya, ug siya molukso, ug mosinggit. Ug pag-adto niya sa iyang trabaho, padayon gihapon siyang ingon niana, ug ang iyang agalon miingon kaniya, “Asa man ka gikan?” Uh-huh. Ganahan baya ko anang mga dapita nga inyong ginaadtoan. Siya miingon, “Didto ka siguro nakig-uban nianang panon sa mga buang-buang didto.”

Siya mitubag, “Nagtoo diay ka nga mga buang-buang sila?”

Ingon siya, “Oo, mga buang-buang man gud sila.”

³⁷ Siya mitubag, “Oo, dalaygon ang Diyos tungod sa mga buang-buang!” Ug miingon siya, “Abi nimo? Ang mga tornilyo adunay importanteng bahin.” Miingon siya, “Pananglitan, ang awto, pag-gitangtang mo ang tanang mga tornilyo gikan niini, wala na’y mahibilin nimo kondili ang usa na lamang ka ‘guba.’” Busa husto gyud kana.

³⁸ Lahi na gyud ka pag-anaa na ang Espiritu Santo kanimo, hangtud nga ang panghunahuna niining kalibutana dili gyud ganahan kanimo, ug supak sila kanimo, ug ayaw nilang magkaaduna og bisan unsa man nga kahilambigitan kanimo, dili gyud sila ganahan. Natawo ka na man sa lahi nga Kalibutan. Ikaw usa na gayud ka langyaw, napulo ka pilo nga mas langyaw pa, kung moadto ka sa pinakalayo nga mga rehiyon sa kalasangan sa Africa. Lahi ka na gyud kung miabot na ang Balaang Espiritu, ug usa Kini ka ilhanan. Usa Kini ka marka taliwala sa mga tawo.

³⁹ Karon, mangutana ka, “Unya, Igsoong Branham, kanang ilhanan nga sirkunsisyon gihatag kang Abraham?” Tinuod kana. “Ug sa iyang Kaliwat?” Oo.

⁴⁰ Sige, karon atong ablihan ang Mga Taga-Galacia, ika-3 nga kapitulo, ika-29 nga bersekulo, ug atong tan-awon kon sa unsang paagi kana maaplikar sa atoa. Mga Taga-Galacia 3:29, ug atong tan-awon kung sa unsang paagi kining sirkunsisyon maaplikar sa Gentil, kon kita mga Gentil; nga, pinaagi sa natural nga pagkahimugso kita mao man.

Karon, una, gusto kong basahon ang ika-16 nga bersekulo.

Karon kang Abraham gisulti ang saad ug sa iyang kaliwat. (kang Abraham ug sa iyang kaliwat!) Wala siya mag-ingon, Ug sa mga kaliwatan, . . .

Bisan kinsa nga . . . moingon, “Oh, kaliwatan usab, ako ni Abraham.” Dili. Sa “Kaliwat,” Kaliwat ni Abraham!

. . . Dili sa mga kaliwatan, ingon nga daw daghan sila; kondili ingon nga usa, Ug sa—sa kanila . . . imong kaliwat, nga mao si Cristo.

⁴¹ Kaliwat ni Abraham si Cristo. Nagatoo ba kamo niana? Bueno, karon atong kuhaon ang ika-28 ug ika-29 nga bersekulo.

Walay Judio, ni Greciahanon, walay ulipon, o dili-ulipon, walay lalake o babaye: kay kitang tanan nahimong usa kang Cristo Jesus.

Ug kong kamo iya ni Cristo, nan sa pagkamatuod, sa kaliwat kamo ni Abraham, ug mga manununod sumala sa saad.

Bueno unsa atong pagsabot aning “Kaliwat ni Abraham”? Kanang anaa kita diha kang Cristo, nan kita Kaliwat ni Abraham. Ug unsa ang Kaliwat ni Abraham? Mahimong, moadto kita sa Mga Taga-Roma 4 ug sa uban pa.

Wala madawat ni Abraham ang saad sa dihang gi-sirkunsidahan na siya. Aron ipakita nga ang pagsirkunsisyon usa lamang ka tipo, tungod nadawat niya ang saad *sa wala pa* siya gi-sirkunsisyon. Ug usa kadto ka tipo, sa pag-ila sa iyang pagtoo nga nabatonan niya sa wala pa siya nasirkunsisyon.

⁴² Bueno, sa diha nga kita anaa na kang Cristo, kita nahimong Kaliwat ni Abraham ug mga manununod na ni Cristo, busa, bisan kinsa pa kita, Judio man o Gentil.

Ug, “ang Kaliwat ni Abraham,” ang Kaliwat ni Abraham adunay pagtoo nga sama sa pagtoo ni Abraham, nga hingpit nga ginatoohan ang Dios sa Iyang Pulong. Bisan pa kung daw sa unsa Kini ka kataw-anan kung tan-awon, bisan dili na sama kaniadto ang imong pagpanglihok, bisan ginahimo ka Niini nga lahi na gyud, hingpit gihapon nimong gitoohan ang Diyos sa Iyang Pulong bisan unsa pa man.

⁴³ Si Abraham sa iyang edad nga kapitoan ug lima na ka tuig, ug si Sarah nga kan-uman na ug lima, gitoohan nila ang Dios sa Iyang Pulong, ug ilang giisip ang bisan unsang supak Niini nga daw dili. Unsa kaha sa tan-aw mo sa gihunahuna sa mga doktor, niadtong panahona? Unsa kaha ang tan-aw mo sa gihunahuna sa mga tawo, sa dihang nakita nila ang usa ka tigulang nga lalaki, kapitoan ug lima ka tuig ang panuigon, nagalakaw-lakaw nga nagadayeg sa Dios, nga “makabaton kono siya’g anak” sa iyang asawa, nga kan-uman ug lima ka tuig na ang pangidaron niini, mga baynte singko ka tuig na nga milapas sa pagka-menopause? Apan, nakita n’yo, makapahimo kini kanimo nga kataw-anan, ang pagtoo ni Abraham.

⁴⁴ Ug sa diha nga kamo gisirkunsisyon na sa Espiritu Santo, mao usab ang ginabuhat Niini kaninyo. Ginapahimo ka Niini og mga butang nga wala nimo damha nga imong mabuhat. Ginapatoo ka Niini sa saad sa Dios ug ginapatoo ka sa Dios.

⁴⁵ Karon, Kini usab, gawas sa usa ka—usa ka saad ug usa ka ilhanan, Usa usab Kini ka selyo. Karon kung ubanan n’yo ako diha sa Mga Taga-Roma. Una, gusto kong ubanan n’yo ako diha

sa Mga Taga-Efeso 4:30, ug basahon nato dinhi sa makadiyut. Mga Taga-Efeso 4:30 nagaingon kini.

Bueno, nadungog na ninyo ang daghang mga tawo nga nagaingon nga ang nagkalainlaing mga butang mga selyo. “Kung moadto ka sa simbahan, aduna ka’y selyo sa maong simbahan.” Ug ang uban nagaingon, “Ang pagsaulog kini sa usa ka adlaw, usa ka adlaw sa sabbath, kana—kana kono ang selyo sa Dios.” Ang uban kanila nagaingon, “Kung magpamiyembro kita sa usa ka denominasyon, maselyohan kono kita ngadto sa Ginghamarian sa Dios.”

⁴⁶ Karon, ang Biblia nag-ingon, “Ang tanang pulong sa tawo bakak, ug ang iya lang sa Dios ang Kamatuoran.” Karon, Mga Taga-Efeso 4:30 ingon niini ang mabasa:

Ug ayaw ninyo pagpasub-a ang Espiritu Santo sa Dios, nga diha kaniya gipatikan kamo alang sa adlaw sa pagtubos.

⁴⁷ Medyo mamahimo na akong mas makuti niini, aron maiklaro kini. Karon, kamong mga igsoon nga legalista magpakahilom lang kamo sa makadiyut. Kita n’yo? Namatikdan ba ninyo kung unsa ka dugay molungtad kana nga selyo? Dili nga hangtud sa sunod nga rebaybal, ni hangtud sa sunod higayon nga adunay mahitabo nga dili maayo. “Hangtud sa adlaw sa imong pagkatubos,” ingon niana kadugay nga ikaw giselyohan. “Hangtud sa adlaw sa imong pagkatubos,” sa diha nga ikaw gitubos na aron mahiuban sa Dios, ingon niana kadugay kang giselyohan sa Balaang Espiritu. Dili gikan sa usa ka rebaybal ngadto sa sunod nga rebaybal; apan gikan sa Eternidad hangtud sa Eternidad, nga ikaw giselyohan sa Balaang Espiritu.

Ingon niana ang Balaang Espiritu, Kini ang selyo sa Dios, nga Iyang nakaplagnan. . . nga ikaw nakakaplag og kahamuot sa Iyang mga mata, ug Siya nahigugma kanimo, ug Siya nagasalig kanimo, ug Siya nagpatik sa Iyang selyo diha kanimo. Unsa ang selyo? Aduna ba’y. . . Aba, ang *selyo* nagamarka o nagapasabot og usa ka “tapos na nga buhat.” Amen. Giluwas ka sa Dios, gibalaan ka, gihinloan ka, nakakaplag ka, og kahamuot ug giselyohan ka. Natapos na Siya. Iya kang produkto hangtud na sa adlaw sa pagtubos kanimo. Ang *giselyohan* maoy usa ka “natapos nga butang.”

Unsa man ang Espiritu Santo? Usa Kini ka ilhanan. Ato kanang hisgotan unya, diha sa laing Mensahe, ang ilhanan nga gihisgotan ni Pablo. Ang mga pagsulti og lahi nga mga pinulongan usa ka ilhanan para sa mga magtotoo, o, sa mga dili-magtotoo.

⁴⁸ Karon matikdi, apan, dinhi, usa ka ilhanan ang Espiritu Santo. Ang buut kong ipasabot. . . Usa ka selyo ang Espiritu Santo. Usa Kini ka ilhanan nga gihatag sa Dios sa Iyang pinili nga mga anak. Ang pagbalibad Niini, nagakahulogan

og pagsalikway palayo sa katawhan; ug ang pagdawat Niini, nagapaundang sa pagka-kalibutanon ug sa tanang mga butang nga iya sa kalibutan, ug mamahimong usa na ka produkto nga gipatikan sa Dios og selyo sa pag-uyon.

⁴⁹ Nagtrabaho ako kaniadto kang Harry Waterberry diha sa riles sa tren, ug moadto kami aron kargahan ang bagon. Ang akong igsoon nga si Doc, nga nagatindog dinha sa luyo, nagatabang kanako sa pagkarga sa mga bagon. Sa diha nga ang bagon nakargahan na, nagaagi kanang bagon, sa inspektor, ug pagmay makita siya og bisan unsa nga luag, nga kini puedeng mahulog ug mabuak, o unsa man nga makaguba; dili niya pagaselyohan ang maong bagon hangtud nga mapuno kana pag-ayo, hangtud nga kana puno na gyud ug hapsay, nga ang pag-uyog sa biyahe dili makadaot sa produkto nga anaa sa sulod.

⁵⁰ Mao kana ang hinungdan nga dili kita maselyohan; tungod kay luag kaayo kita sa mga butang. Pagmoanha na ang Inspektor, aron usisaon ang atong kinabuhi, ug hibaloon kung dili ka ba medyo luag sa mga butang, medyo luag sa imong mga pag-ampo, medyo dali ra ka masuko, medyo dili nimo makontrol imong dila, sa pagpanglibak sa uban, dili gyud Niya selyohan ang maong bagon. Pag-aduna pa'y mahugaw nga pamatasan, pipila ka mangil-ad nga mga butang, mahilas nga panghunahuna, dili Niya mahimong selyohan kana nga bagon.

Apan sa dihang Iyang hingkaplagan nga ang tanan nakapahimutang og sakto, ang Inspektor, nan pagaselyohan Niya kini. Wala na'y si bisan kinsa ang makaabli niana nga selyo hangtud nga kana nga bagon makaabot ngadto sa iyang destinasyon kon diin kini selyado nang mopaingon! Tan-awa. "Ayaw paghilabti ang Akong mga dinihog; ayaw pagbuhat og dautan sa Akong mga manalagna. Kay nagaingon ako kaninyo, maayo pa kanimo nga pagabitayan sa liog o usa ka daku nga galingang bato ug igatunlod sa kahiladman sa dagat, kaysa pagsulay sa pagpangdol o pagtay-og og diyutay sa pinakagamay niini nga mga naselyohan na." Nakita ba ninyo kung unsa ang ginapasabot niini?

⁵¹ Ingon niana ang Balaang Espiritu. Kini ang inyong kasigurohan. Kini ang inyong panalipod. Kini ang inyong saksi. Kini ang inyong selyo. Kini ang inyong ilhanan, nga, "Ako'y paingon na sa Langit. Dili ko igsapayan kung unsa ma'y isulti sa yawa! Ako'y paingon na sa Langit. Ngano man? Iya kong giselyohan. Gihatag Niya Kini kanako. Iya na akong giselyohan pasulod sa Iyang Ginghamian, ug ako'y paingon na sa Himaya! Mohaguros man ang hangin, buhaton man ni Satanas iyang gusto. Human na akong giselyohan sa Dios hangtud sa adlaw sa akong pagtubos." Amen! Ingon niana ang Espiritu Santo. Oh, kinahanglan n'yong tinguhaon Kini. Dili ko makapadayon nga wala Kini. Daghan pa unta ang mahimong isulti, apan sigurado kong nahibalo na mo kung unsay akong pasabot.

⁵² Karon, usab, atong ablihan ang Juan 14, sa makadiyut lang. Ganahan lang gyud ko sa Pulong! Kini ang Kamatuoran.

⁵³ Karon, ang Espiritu sa Dios, ang Espiritu Santo, unsa man ang Espiritu Santo? Ang Espiritu kini ni Cristo nga anaa kaninyo. Karon, adisir kita magabasa, gusto ko lang maghatag og hamubong komentaryo dinhi. Unsa man ang Espiritu Santo? Usa Kini ka selyo. Unsa man ang Espiritu Santo? Usa Kini ka pakigsaad. Unsa man ang Espiritu Santo? Usa Kini ka ilhanan. Unsa man diay ang Espiritu Santo? Kini usa ka . . . ang Espiritu ni Jesus Cristo diha kaninyo. Kita n'yo? “Sa diriyut lamang panahon,” miingon si Jesus, “ug ang kalibutan dili na makakita Kanako; apan kamo makakita Kanako, kay Ako magauban kaninyo, gani diha mismo kaninyo, hangtud sa katapusan sa kalibutan.” Espiritu sa Dios diha sa Iyang Iglesia!

⁵⁴ Para unsa? Para sa unsa man nga Iya kining gibuhat? Kini usa ka gamay'ng bahin sa hilisgotan ugma sa gabii. Apan alang sa unsa man nga Iya kining gibuhat? Nganong gibuhat Niya, ngano man nga ang Espiritu Santo . . . Unsa, para sa unsa man nga Siya mianhi? Sa unsa mang katuyoan nga mianha Siya kanimo, sa unsang katuyoan nga mianhi Siya kanako? Kini maoy ipadayon ang mga buluhaton sa Dios.

⁵⁵ “Kanunay Kong ginabuhat kung unsa ang makapahimuot sa Akong Amahan. mianhi Ako dili sa pagbuhat sa Kaugalingon Kong kabubut-on, kondili ang kabubut-on sa Amahan nga nagpadala Kanako. Ug ang Amahan nga nagsugo Kanako ania uban Kanako; ug ingon nga ang Amahan nagsugo Kanako, sa maong pagkaagi ako nagsugo kaninyo.” Oh, grabe! Ang Amahan nagsugo Kaniya, misulod Kaniya. Ang Amahan nga nagsugo kang Jesus misulod Kaniya, namuhat pinaagi Kaniya.

Ang Jesus nga nagsugo kaninyo, nagauban kaninyo ug anaa kaninyo. Ug kung ang maong Espiritu, nga nagpuyo kang Jesus Cristo, nga nagpabuhat Kaniya ug nagpalihok Kaniya sa maong mga paglihok, aduna na ka'y ideya kung unsa'y pagabuhaton Niini kung Kini anaa na kanimo, tungod kay kana nga Kinabuhi dili mausab. Mobalhin Kini gikan sa lawas ngadto sa ubang lawas, apan dili Niini mahimong usabon ang kinaiyahan Niini, kay Dios man Kini.

⁵⁶ Karon sa Juan 14, magabasa lang kita'g gamay, sugod sa ika-10 nga bersekulo.

Wala ka ba motoo . . . nga ako ania sa Amahan, ug ang Amahan ania kanako? Ang mga buhat . . . ang mga pulong nga akong ginapamulong kaninyo wala ko igapamulong sa akong kaugalingon: apan ang Amahan nga nagapuyo kanako, siya gayud ang nagabuhat sa mga buhat.

Palandunga n'yo kana. Karon:

Tumoo kamo kanako nga ako ania sa Amahan, ug nga ang Amahan ania kanako: kondili hinoon, tumoo kamo kanako tungod sa mao usab nga mga buhat.

Sa pagkamatuod, sa pagkamatuod, nagaingon ako kaninyo, Ang motoo kanako, magabuhat sa mao usab nga mga buhat nga gibuhat. . . ko; ug pagabuhaton niya ang labaw pa niini; kay ako moadto ngadto sa akong Amahan.

Wala n'yo ba makita? Tan-awa kung giunsa Niya pagsulti dinha? Karon matikdi kini, kung unsay mahitabo. Magbasa pa ko og pipila pa. Magabasa kita hangtud sa ika-20 nga bersekulo. "Ug bisan unsang butang nga pangayoon ninyo. . ." Atong Tan-awon, aduna ko'y. . . Oo. Uh-huh. Sige.

Ug bisan unsang butanga nga pagapangayoon ninyo sa akong ngalan, akong pagabuhaton, aron ang Amahan pagahimayaon sa Anak.

Kong kamo mangayo bisan unsa sa akong ngalan, akong pagabuhaton kini.

Kong nahagugma kamo kanako, magabantay kamo sa akong mga sugo.

Ug ako magaampo sa Amahan, (karon matikdi) ug siya magahatag kaninyo ug lain nga Maglilipay, aron siya magpuyo uban kaninyo sa walay katapusan;

Nga mao ang Espiritu sa kamatuoran; nga ang kalibutan dili makadawat kay dili niya makita siya, bisan maila: apan kamo makaila kaniya; kay mopabilin siya uban kaninyo, ug anha kaninyo.

⁵⁷ Kinsa man kana nga Espiritu? Unsa man ang Espiritu Santo? Si Cristo kini nga anaa kaninyo. Ang Maglilipay, kana mao ang Balaang Espiritu. "Ug pagmianha na ang Maglilipay, Siya magabuhat sa samang mga butang nga Akong gibuhat kaniadto sa diha nga ang Maglilipay ania Kanako. Ako magaampo sa Amahan, ug Siya magahatag kaninyo niining Maglilipay. Makaila kamo sa Maglilipay. Apan ang kalibutan dili makaila Kaniya, dili gayud. Apan kamo makaila Kaniya tungod kay Siya nagapuyo na kaninyo," Si Jesus nga nagasulti, "apan Siya maanaa kaninyo." Mao kana, kana ang Maglilipay, "nga maanaa kaninyo."

Dili ko kamo pagabiyaan nga mga ilo: magabalik ako kaninyo.

"Dili Ako. . ." Karon, mao kana ang Maglilipay, si Cristo. Ingon niana ang Espiritu Santo, si Cristo.

Sa diriyut lamang panahon, ug ang kalibutan dili na makakita kanako; apan kamo mahimong makakita kanako: Kay ako mabuhi, kamo. . . mabuhi usab.

58 Oh, puede kita magpadayon pa; apan, aron lang ipahibalo kaninyo. Kung unsa Siya? Siya usa ka selyo. Siya usa ka ilhanan. Siya usa ka Maglilipay. Nakita n'yo kung unsa Siya? Ang Kaliwat ni Abraham ang magapanunod Niini.

59 Karon ato sab hibaloon . . . kung unsa pa kining Maglilipay. Moadto kita sa Unang Juan 16:7, tan-awon nato kung dili ba Siya usa ka Manlalaban, usab. Nahibalo na kamo siguro kung unsa ang manlalaban, ang pagpanlaban. Aduna kita'y Manlalaban. Nasayod kita niana. Unang Juan sa ika-16 nga kapitulo . . . Oh, kadiyut lang, pasayloa ko. San Juan, mao kini, 16:7. Pasayloa ko. Pasayloa ko nga mao to akong naingon. Nasayop ako sa pagbasa sa akong . . . ania na ang 16:7.

Bisan pa ako nagasulti kaninyo sa kamatuoran; mapuslanon alang kaninyo nga mogikan ako: kay kong dili ako mogikan, ang Maglilipay dili moanhi kaninyo; apan kong ako mogikan, pagasugoon ko siya kaninyo.

Ug kung siya moanhi na, pagabadlungon niya ang kalibutan mahatungod sa sala, ug sa katarungan, ug sa paghukom:

Mahatungod sa sala, kay wala silay pagtoo kanako;

Ug mahatungod sa pagkamatarung, kay ako moadto sa akong Amahan, ug kamo dili na makakita kanako;

Ug mahatungod sa paghukom, kay ang principe niining kalibutana ginahukman na.

60 Grabe! Bueno, ang Manlalaban, makita diha sa—sa Unang Juan 2:12. Karon atong basahon kana, sa makadiyut, Unang Juan 2:12. Pasayloa ko, Unang Juan . . . 1 ug 2, kini. Gisulat ko kini, Unang Juan 2:1 hangtud 2.

Mga anak ko, nagasulat ako kaninyo niining mga butanga, aron dili kamo managpakasala. Apan kong may uban nga makasala, may Manlalaban kita uban sa Amahan, si Jesus Cristo nga matarung:

Kinsa ang Manlalaban? Si Jesus Cristo nga matarung.

Ug siya mao—ug siya mao ang halad sa pagpasig-uli tungod sa atong mga sala, ug dili lamang tungod sa ato, kondili usab tungod sa iya sa tibook nga kalibutan.

61 Unsa man ang Espiritu Santo? Kini usa ka Manlalaban. Unsa ma'y ginabuhat sa usa . . . Unsa man ang usa ka Manlalaban? Unsa ma'y ginabuhat Niini? Ang pagdapig. Aduna Kini og kalooy. Kini, Kini magabarog puli kanimo. Kini, Kini ang nagabuhat sa mga butang nga dili nimo mahimo. Kini, Kini—Kini ang halad pagpasig-uli para sa imong mga sala. Kini ang imong pagkamatarung. Kini ang imong kaayohan. Kini ang imong Kinabuhi. Kini ang imong pagkabanhaw. Kini ang tanan nga anaa sa Dios alang kanimo. Siya usa ka Manlalaban.

⁶² Mahimo mismo kitang moadto sa mga pagdetalye pinaagi niana ug pahatpahaton kana, kung unsa nga sa dihang Kini—sa dihang Kini nagapataliwala alang sa atong pagkawalay-alamag. Usahay sa dihang ang . . . pag-aduna kanato ang Espiritu Santo, dayon dili nato mamatikdan nga nadagma kita sa usa ka butang. Ang Balaang Espiritu anaa aron sa pagdapig alang kanato. Siya ang atong Manlalaban. Iyang panalipdan ang atong. . . Siya ang atong Abogado. Nagabarog Siya didto ug nagapangaliya alang kanato. Wala kita nagapangaliya alang sa atong kaugalingon, tungod kay ang Espiritu Santo nga ania kanato mao nagapangaliya alang kanato. Ang Balaang Espiritu nagahatag og mga pulong aron ikasulti, usahay uban sa mga pulong nga dili nimo masabtan, ug Siya nagapangaliya alang kanato. Ingon niana ang Espiritu Santo.

⁶³ Pag aduna ko’y matamakan, ako—nagalakaw man gud ako nga daw usa ka gamay nga bata; nagalakaw usab kamo sama sa usa ka bata. Kita, nagalakaw kita sa mangitngit nga kalibutan nga puno og mga kaaway, puno og kasal-anan, puno og mga lit-ag, puno sa tanan-tanan.

Miingon ka, “Oh, nahadlok ako. Mahadlok ko modawat og kinabuhi’ng Cristohanon. Ako, mahadlok ko nga buhaton *kini*. Mahadlok ko nga basin mabuhat ko *niini*.”

Ayaw kahadlok. Aduna kita’y Manlalaban. Amen. Oh, Siya nagabarog tupad nato. Anaa Siya kanato, ug Siya nagapangaliya alang kanato. Ang Balaang Espiritu, sa kanunay, sa kanunay nagadapig kanato, sa tanang panahon. Siya ang atong Manlalaban. Oh, nagapasalamat gyud kita sa Dios alang niana!

⁶⁴ Usa ka selyo, usa ka ilhanan, Espiritu sa Kinabuhi, Dios sa Langit, ang Maglilipay, ang Kinabuhi, ang Manlalaban. Unsa man Siya? Oh, grabe! Mahimo gani kitang magpadayon pa niini sulod sa daghang mga oras.

⁶⁵ Pero molahi sá kita sa makadiyut lang. Mangutana kita karon. . .

Aduna gyu’y gisaad kanato para sa katapusang mga adlaw! Kining Manlalaban, selyo, saad, ang tanan nga atong gihisgotan mahitungod Kaniya karong gabhiona, napulo ka libo pa ka pilo, Gisaad kini kanato sa katapusang adlaw.

Wala sila Niini niadtong adlawa. Aduna lang sila’y usa ka selyo sa ilang unod, ingon nga usa ka timaan ug usa ka ilhanan, sa pagtoo nga Kini magaabot, ug sila naglakaw kaniadto ilalum sa landong sa kasugoan. Nga, sila gisirkunsisyon sa unod.

⁶⁶ Karon kita wala na nagalakaw sa landong sa kasugoan. Nagalakaw kita pinaagi sa gahum sa pagkabanhaw. Nagalakaw kita pinaagi sa gahum sa Espiritu, Nga mao ang atong tinuod nga selyo, atong tinuod nga Manlalaban, atong tinuod nga Maglilipay, atong tinuod nga ilhanan nga kita natawo na gikan

sa Itaas; talagsaon, lahi nga mga tawo, kataw-anan, ginasaligan ang Dios sa Iyang Pulong, nga ginaisip ang tanang uban pa ingon nga sayup. Ang Pulong ra sa Dios ang husto. Kana'y . . . Oh, grabe! Ingon niana ang Espiritu Santo.

67 Gusto ba ninyo Kini? Dili ba kamo ganahan nga makabaton Niini? Atong tan-awon kon Kini ba gyud gisaad.

Karon mobalik kita sa Isaias, ang Basahon ni Isaias. Atong kuhaon ang ika-28 nga kapitulo sa Isaias. Bueno kita moadto sa Isaias 28, ug kita magsugod diha sa mga . . . Atong ablihan sa ika-8 nga bersekulo, tan-awon nato kung unsay giingon ni Isaias, pito ka gatus ug dose ka tuig sa wala pa Kini miabot.

68 Daghan kita'y mahisgotan bahin niini, pabalik, sa sinugdanan, pero sugdan lang nato dinhi ug tan-awon kung gisaad ba Kini ngadto sa Iglesia. Kung unsang adlaw ba Kini gitoohang moabot? Sa katapusang mga adlaw, sa dihang aduna na'y usa—usa ka kadautan. Karon hinumdumi, ang pulong anaa sa pang-dinaghan, “mga adlaw,” sa katapusang duha ka adlaw, sa katapusang duha ka libo ka tuig.

Karon, karon ang ika-8 nga bersekulo.

Tanan, *Kay ang tanan nga mga lamesa nangapuno . . . ug kahugawan, hangtud nga wala nay impyo nga dapit.*

69 Susiha n'yo ang palibot sa karon aron makita kini. Tan-awa ang palibot ug tan-awa kung anaa na ba kita nianang adlaw. “Tanang lamesa!” Aba, moadto sila sa Panihapon sa Ginoo, ug ang unang buhaton, sa materyal nga bahin, magkuha'g usa ka buok nga gamay'ng tinapay o usa ka soda cracker, ug pahat-pahaton kini ug himoong komunyong. Nga, ang Balaang Espiritu unta ang angay'ng mobuhat niana, ug tinapay nga walay levadura unta. Si Cristo dili hugaw ug mahugaw, ug kana'y nagarepresentar Kaniya.

70 Usa pa, ginapaambit nila niini ang mga tawo nga nagainum, nagapamakak, nagapangawat, nagapanigarilyo, nagamama, (whew!) bisan kinsa na lang, basta miyembro sila sa iglesia. Ipahilayo lang unta! Kay kon ang maong tawo moambit niini sa dihang kita nagakomunyong dinhi, siya nagginghawa ug nagainom og hukom sa silot alang sa iyang kaugalingon, nga walay pag-ila sa Lawas sa Ginoo. Kung wala niya ginakinabuhi ang maong kinabuhi, dili siya ipaambit niini.

Ug kung dili pud ka moambit niini, nagapakita kini nga sad-an ang imong kaugalingong konsensiya. “Ang dili mokaon, walay bahin Kanako,” Si Jesus miingon.

71 Apan ang tanang lamesa sa Ginoo napuno sa kahugawan. Wala na'y limpyo nga dapit. Paminaw, kung dili ba kana nagahulagway sa karong panahon!

Kinsa man ang...kinsa man ang iyang tudloan ug kaalam? ug kinsa man ang iyang...pasabton sa balita?...

...kinsa ang makasabot sa kaalam?... kinsay iyang pasabton sa balita?...

“Bueno, dalaygon ang Dios, Presbyterian ako. Methodist ako. Pentecostal ako. Nazarene ako. Pilgrim Holiness ako.” Wala kana’y ni usa ka kahulogan sa Dios. usa lang ka lain pang lamesa.

...kinsay akong ipahibalo sa balita?...

⁷² Unsa nga matang sa balita; Methodist, Baptist, Presbyterian, Pentecostal? Ang Balita sa Biblia!

...kinsay akong ipahibalo sa balita?...

⁷³ Unsaon nimo pagkahibalo kung nakabaton ka Niini? Ato kanang pagahisgotan sa Biyernes sa gabii. Kita n’yo?

...kinsa man ang akong pahibalo sa balita? (karon bantayi) sila ba, nga mga gipanguha sa mga dugnan.

⁷⁴ Ang gagmay’ng mga bata moingon, “Bueno, nagasimba man ko, ang akong mama miyembro man niini nga iglesia.” Wala ako’y supak niana, minahal nga igsoon. Ug nasayod ako nga ginatelyp kini. Okey lang kana, ang mahisakop sa iglesia ni mama. Apan, paminaw, si mama naglakaw sa usa ka kahayag, ikaw nagalakaw sa lahi na nga kahayag.

⁷⁵ Si Luther naglakaw kaniadto sa usa ka kahayag; si Wesley sa lain. Si Wesley naglakaw sa usa ka kahayag; Ang Pentecostes naglakaw sa lain. Apan kita nagalakaw sa mas hataas kaysa niana karon. Ug kung adunay laing henerasyon, molapas pa kini kanato.

⁷⁶ Kaniadtong unang mga panahon, sa dihang ang maong butang halapad pa, halapad pa kaayo, si Luther nagtudlo og pagpamatarung pinaagi sa pagtoo. Para lang kadto nga makuha ang mga tawo gikan sa Katolisismo paingon sa Protestantismo, paingon sa panagtigum palibot sa Pulong. Pagpamatarung pinaagi sa pagtoo, usa kadto ka dako og halapad nga dapit. Wala gyud sila mihawa gikan niana.

⁷⁷ Dayon miabot ang laing rebaybal nga gitawag og John Wesley. Gitay-og sila niini gikan niana, ug midala kaniya ngadto sa pagpabalaan, ang pagkinabuhi nga maayo, limpyo, balaan nga kinabuhi, nga gibalaan sa Pulong sa Dios, nga nagahatag og kalipay sa imong kasingkasing. Gitay-og niadto ang daghang doktrina sa Lutheran.

⁷⁸ Dayon miabot ang Pentecostes uban sa bautismo sa Espiritu Santo, ug gipahiktin kini pag-usab, pinaagi sa pagdawat sa Espiritu Santo. Husto kana.

Ug karon sugod na usab kana nga ginatay-og. Ug ang mga gasa, ug ang pagpasig-uli, ug ang Espiritu sa Dios misulod na, diha sa kahupnganan sa mga ilhanan ug mga katingalahan, ngadto sa Iglesia, ug miuyog sa Pentecostes. Unsa man Kini? Haduol na kaayo kita sa Pagbalik ni Ginoong Jesus, hangtud nga ang Espiritu mismo nga atua Kaniya kaniadto nagapamuhat na sulod sa Iglesia, ginabuhat ang mao gihapon nga mga butang nga Iyang gibuhat sa dinhi pa Siya sa yuta. Wala pa gayud kini nahitabo, sukad sa panahon sa mga apostoles hangtud niining panahona.

Ngano man? Tan-awa, kini halapad; dayon nagakahiktin, nga nagakahiktin, nga nagakahiktin. Unsa man kini? Sama sa imong kamot nga nga nagapadulong sa landong niini; ang negatibo, negatibo, negatibo. Apan unsa man kini? Usa kini ka repleksyon. Unsa man kaniadto si Luther? Usa ka repleksyon ni Cristo. Unsa man si Wesley? Usa ka repleksyon ni Cristo.

⁷⁹ Tan-awa, ang panahon ni Billy Sunday bag-o lang natapos. Atong miaging adlaw, ang tigulang nga si Dr. Whitney, nagtudlo dinhi mismo niini nga pulpito, ang katapusang usa sa karaang mga magwawali, namatay siya, nga mga nubentahon na, siguro. Si Billy Sunday usa ka rebaybalista ngadto denominasyonhong mga iglesia sa iyang panahon. Wala siya'y pugong-pugong; motindog didto ug mosinggit, "Kamong mga Methodist mangduol kamo sa altar, mga magwawali ug tanan na! Kamong mga Baptist mangluhod kamo sa altar! Kamong mga Presbyterian!" Wala siya'y pugong-pugong. Siya ang Billy Graham karong panahona.

⁸⁰ Matikdi. Ug unya, sa samang higayon nga ang denominasyonhong iglesia nagapahigayon sa ilang rebaybal, unsay nahitabo? Ang Full Gospel nagapahigayon usab og usa ka rebaybal. Migula ang managsuon Bosworth, Smith Wigglesworth, ug Dr. Price, Aimee McPherson, silang tanan.

Tan-awa, si Smith Wigglesworth namatay usa ka gabii. Namatay si Doctor Price pagkasunod buntag. Sulod sa baynte kwatro ka oras niadto atua ako pagpangmisyon.

⁸¹ Karon hapit na pud ang akong katapusan. Tan-awa. . . Wala na kaayo mo'y madungog mahitungod kang Billy Graham. Wala na kaayo mo'y madungog bahin kang Oral Roberts. Nakita nako nga akong mga panagtigum paingona na pud og kahanaw. Unsa ma'y nagakahitabo? Ania na kita sa katapusan, sa laing kapanahonan.

⁸² Giunsa man pagsulod ni Billy Sunday, ug nila? Nangabot sila pagkahuman ra sa dakung rebaybal ni Moody. Kanus-a misulod si Moody? Pagkahuman lang sa rebaybal ni Knox. Kanus-a nisulod si Knox? Pagkahuman lang sa rebaybal ni Finney. Finney pagkahuman ni Calvin, si Calvin pagkahuman ni. . . Mao nga, si Wesley, ug si Wesley misunod ra kang Luther.

Ug ingon niana ang nagakahitabo sa tanang kapanahonan. Pagkahuman sa usa ka rebaybal, ang Dios mopatindog og lain na usab ug mopadan-ag og dugang nga Kahayag; ug padayon nga ingon niana.

⁸³ Karon ania na kita sa katapusan niining panahona. Ang matag tawo hangtud sa katapusan sa iyang panaw nagpaabot sa Pagbalik ni Cristo, apan daghan pa silang paabuton nga makita; ang pagbalik sa mga Judio, mga flying saucer diha sa kawanangan, ang tanang butang nga atong makita sa karon. Apan kita anaa na sa katapusan. Ania na kita karon. Nasayod sila nga ang Iglesia makadawat og Gahum nga maoy mamuhat diha sa Iglesia sa samang mga buhat ni Cristo, tungod kay sa diha nga ang landong mas nagakaitum ug nagakaitum, kini mas nagaklaro pa.

⁸⁴ Pananglitan ang landong. Pag mas layo ang landong, mas dili klaro nga hulagway ang imong makuha gikan sa maong landong. Taudtaud, sa dihang nagakahaduol nga nagakahaduol ang landong, ang kahoy ug ang landong nagakahimong mao rang butang.

⁸⁵ Bueno, ang Espiritu sa Dios namuhat ilalum sa pagpamatarung, ilalum ni Luther; pagpabalaan, ilalum ni Wesley; bautismo sa Espiritu Santo, ilalum sa Pentecostal; ug ania na Kini sa katapusang adlaw, nga nagapamuhat ug ginahimo ang mao mismong mga butang nga gihimo Niini sa dihang atua pa Kini kang Cristo. Unsa man kini? Ang Iglesia ug si Cristo nahimong Usa.

Ug sa diha nga magka-konekta na Sila, kanang katapusang pagkadugtong, Siya’y mokayab na paingon sa kawanangan, nga nagasinggit. Mokayab sab ang mga kang Wesley, kang Luther, ug tanang uban pa kanila sa kaniadtong mga adlaw, “siya nga nahauna manghiulahi, siya nga naulahi manghiuna,” ug mahitabo ang pagkabanhaw.

⁸⁶ Ania na kita sa katapusang panahon. Paminaw, mao kana ang ginabuhat sa Espiritu Santo. Ang Espiritu Santo, pinaagi sa pagpamatarung, kita n’yo, usa lamang kaniadto ka diyutay nga landong Niini; ang Espiritu Santo, pinaagi sa pagpabalaan, usa kaniadto ka gamay’ng mas lawum nga landong Niini; ang Espiritu Santo, pinaagi sa bautismo Niini, usa ka mas lawum pa gyud nga landong; karon ang Espiritu Santo, pinaagi sa pagpahibalik sa mismong Persona Niini nga ania na dinhi karon, nagapamuhat og mga ilhanan ug mga katingalahan sama sa Iyang gibuhat kaniadto sa sinugdan. Whew! Himaya! Tawagon man ninyo ko og “holy-roller,” sa gihapon, sugdan n’yo na lang karon.

⁸⁷ Paminaw, mga kaigsoonan, paminawa n’yo kini.

...ang tanan nga mga lamesa nangapuno sa sinuka...wala nay limpyo nga dapit.

Kinsa man ang iyang tudloan ug kaalam? . . . kinsa man ang iyang pahibaloan, pasabton sa balita? sila ba, nga mga nalutas sa gatas, ug ang mga gipanguha sa mga dughan.

Dili gagmay nga mga masuso; Presbyterian nga mga masuso, Methodist nga mga masuso, Pentecostal nga mga masuso, Lutheran nga mga masuso, Nazarene nga mga masuso. Gusto Niya kadtong andam nang mapahilayo sa mga suso ug andam nang mokaon og gahi nga karne. Ania kini:

Kay kini mao ang sugo ibabaw sa sugo, . . . ibabaw sa sugo; lagda ibabaw sa lagda, . . . ibabaw sa lagda; dinhi madiyutay, didto madiyutay:

Hinonoa, sa lumalangyaw nga mga ngabil ug sa laing dila Ako mosulti niining katawohan.

Kanila miingon siya, Kini mao ang pahulay, diin hatagi ninyo ug pahulay siya nga ginakapuyan; ug kini mao ang makapahayahay: apan dili sila manimati.

⁸⁸ Ang Balaang Espiritu, kung dili kana ang paagi nga miabot Kini niadtong Adlaw sa Pentecostes, nga gipropesiya na pito ka gatus ug dose ka tuig sa wala pa Kini miabot! Atua Kini niadtong Adlaw sa Pentecostes, nga eksaktong miabot gayud.

⁸⁹ Adunay miingon, “Ang pagbantay man kana sa adlaw nga sabbath.” Dili sa ginasalikway ko o ginatamay ang iglesia o relihiyon ni kinsa man. Apan ang ingon, “Ang adlaw nga sabbath, ang sabbath sa Dios mao ang adlaw sa igpapahulay.”

Ania ang adlaw sa kapahulayan. “Kini ang kapahulayan,” Ingon Siya, “nga inyong ginapapahulay ang mga gikapuyan.” Mao na kini. Amen! “Kini mao ang sugo ibabaw sa sugo, ang lagda ibabaw sa lagda.” Ania ang kapahulayan. Unsa man ang Espiritu Santo? Ang kapahulayan. Oh!

Umari kanako, kamong tanan nga gikapuyan ug gibug-atan, ug papahulayon ko kamo.

⁹⁰ Unsa man Siya? Ang Usa nga nagasulod kaninyo, nagahatag kaninyo og kalinaw; ang inyong ilhanan, ang inyong Maglilipay; nga gihupay kamo, gipapahulay, giselyohan.

⁹¹ Giunsa man ninyo . . . ? Kini usa ka ilhanan; nga masayran sa kalibutan nga aduna gyu’y nahitabo kaninyo. Unsa man Kini? Kini usa ka Maglilipay. Unsa kini? Usa ka selyo. Anaa na kamo sa kapahulayan. Nga kamo adunay . . . Inyo Kining Manlalaban. Kung, ikaw, adunay mahitabo kanimo, aduna dayon og Butang dinha nga modapig kanimo, kita n’yo, nga nagapangaliya alang kanimo. Ang Espiritu kini sa Dios nga nagapuyo sa Iglesia, nga eksaktong gipropesiya kung unsa Kini pagmoabot na Kini. Kini mao ang walay katapusan, Eternal nga kapahulayan.

⁹² Gibuhat kaniadto sa Dios ang kalibutan. Mga Hebreohanon, ika-4 nga kapitulo. “Gibuhat sa Dios ang kalibutan, ug mipahulay sa ikapito ka adlaw.” Husto kana.

Sa ikawalong adlaw mao ang pagbalik pag-usab sa sinugdan, ilalum sa . . . Gihatag Niya kana sa mga Judio ingon nga usa ka pakigsaad, sulod sa usa ka gidugayon nga panahon. Husto kana. Apan moadto sila ug mopahulay usa ka adlaw; balik na usab, sa unang adlaw sa semana, mosugod na usab, nga bag-o, dayon pahulay na usab. Dili kana nga kapahulayan ang ginapasabot sa Dios.

Sa dihang gibuhat sa Dios ang kalibutan sa unom ka adlaw, sa dihang mipahulay Siya, mipahulay na Siya sugod niadto. Husto kana. Mao na kadto. Wala Siya mibalik sa ikawalong adlaw ug nagsugod pag-usab.

⁹³ Usa lang kadto ka landong. Bueno, usa kadto ka tipo, sama sa bulan ngadto sa adlaw; apan pagnagasubang na ang adlaw, dili na nato kinahanglan ang bulan. Karon matikdi kini, oh, diha sa Pinadayag 11, “Ang babaye nga adunay bulan sa ilalum sa iyang mga tiil, ug ang adlaw sa iyang ulo.” Oh, mahimo natong susihon ang tibuok Biblia, gikan sa sugod hangtud mahuman, ug ipakita kaninyo. Kita n’yo?

⁹⁴ Apan unsa man kini? Sa dihang, giingon sa Biblia diha sa Mga Hebreohanon sa ika-4 nga kapitulo, “Kon si Jesus mihatag pa kanila og adlaw nga kapahulayan, nagasulti na unta Siya mahitungod niini; naghigot unta Siya mahitungod sa adlaw sa pagpahulay.” Unsa diay nga adlaw ang Iyang gisulti mahitungod, sa pagpahulay?

Umari kanako, kamong tanan nga gikapuyan ug gibug-atan, ug papahulayon ko kamo.

⁹⁵ Mateo ika-11 nga kapitulo, ika-22 nga bersekulo. . . Tan-awa, unya, atong hingsayran nga sa dihang kita moduol Kaniya. “Kay siya” sumala sa Mga Hebreohanon 4, “nga nakasulod na sa kapahulayan ni Jesus, nakapahulay usab siya sa iyang kalibutanong mga buhat, sumala sa gihimo sa Dios gikan sa Iyang mga buhat,” sa diha nga Iyang gibuhat ang kalibutan, sa tumong nga dili na kini pagabuhaton pag-usab. Unsa ka dugay? Hangtud kanus-a kamo nga selyado sa Espiritu Santo? “Hangtud sa adlaw sa inyong pagtubos.” Kana ang kapahulayan, kahupayan, Manlalaban, selyo, Manluluwas. Oh! Medyo nalipay gyud ko, o napanalanganin gyud ko. Oh!

⁹⁶ “Gisaad ba Kini alang kanato, Igsoong Branham? Mapamatud-an ba kini sa Biblia?”

Sige, ablihan nato ang Joel, para hingsayran kung unsa ang gisulti ni Joel bahin Niini.

Mapasalamaton kaayo ko sa mapanalanginong Pulong sa Dios! Gusto n’yo ba Kini? Nagatoo ko nga kung dili tungod

sa Pulong, wala ako kabalo kung asa na kaha kita karon nagabarog. Oo.

Ania kita sa Joel karon. Ablihan nato ang Joel, ang ika-2 nga kapitulo sa Joel, ug magsugod kita sa ika-28 nga bersekulo. Joel 2:28, walo ka gatus ka tuig sa wala pa mianhi si Cristo, ang propeta diha sa Espiritu. Karon paminaw mo.

Ug unya mahitabo sa ulahi, nga igabubo ko ang akong Espiritu ibabaw sa tanang unod; . . . ang inyong mga anak nga babaye ug ang inyong mga anak nga lalake managpanagna, ang inyong mga tawong tigulang managdango sa mga damgo, ug ang inyong mga batanong lalake makakita sa mga panan-awon:

Ug ingon man usab ibabaw sa akong mga sulogoon nga lalake, ug ibabaw sa akong sulogoon babaye igabubo ko niadtong mga adlaw. . . igabubo ko, niadtong mga adlaw, ang akong espiritu.

Ug ako magapakita sa mga katingalahan diha sa langit ug sa yuta, ang dugo, . . . kalayo, ug ang mga haligi nga aso.

Ang adlaw mahimong kangitngitan, ug ang bulan mahimong dugo, sa dili pa ang daku ug . . . makalilisang nga adlaw sa GINOO nga moabot.

Ug mahitabo, nga bisan kinsa nga magatawag ngadto sa ngalan sa GINOO pagaluwason:

97 Kana usa ka . . . Oh! Unsa? Joel! Namatikdan ba ninyo? Diha sa Mga Buhat 2, gigamit ni Pedro ang mao rang bersekulo. Miingon, “Kamong mga tawo sa Israel, patalinghugi ang akong mga pulong. Dili kini sila hubog,” kining mga selyado, gilipay, talagsaon, gimarkahan nga mga tawo. “Dili sila hubog, ingon sa pagdahum ninyo,” Mga Buhat 2, “kay ikatulo pa lamang karon nga takna sa adlaw. Apan kini mao ang gisulti kaniadto ni Joel nga propeta, nga nagaingon, ‘Unya mahitabo sa katapusang mga adlaw nga igabubo Ko ang Akong Espiritu ibabaw sa tanang unod.’”

98 Unsa Kini, unsa man ang Espiritu Santo? Sige, karon atong himatikdan pag-usab, gisaad ngadto sa mga magtotoo, ingon niana Kini. Karon, kining Espiritu Santo, atong hingsayran kung unsa Kini, taudtaud. Kang kinsa Kini gisaad? Sa mga magtotoo.

Karon moadto kita sa Lucas, ika-24 nga kapitulo sa Lucas, paminawa kung unsa ang gisulti ni Jesus sa Iyang katapusang mga Pulong sa wala pa Siya mibiya sa yuta. Lucas ika-24 nga kapitulo. Ug kamo nga ginasulat kini karon, puede ninyong markahan kini, dayon tun-i kini ugma kung naa mo’y panahon. Karon, Lucas 24:49, paminawa si Jesus nga nagasulti. Sa katapusan, sa dihang Siya mikayab ngadto sa Himaya, ang

pagkayab, ania ang mga Pulong nga Iyang gisulti ngadto sa Iyang mga tinun-an.

...ania karon, Akong ipadala ang saad sa akong Amahan...

Unsa nga saad? Ang selyo, ang ilhanan, ang Maglilipay, ug ang tanan niining mga butang nga ako nang gihisgotan, sa pila ka libo na nga higayon.

...Akong ipadala ang saad sa akong Amahan alang kaninyo:...

Unsa nga saad? “Kadtong giingon ni Isaias nga moabot, ‘Sa lumalangyaw nga mga ngabil ug uban sa laing dila siya mosulti niining katawohan.’ Akong igapadala kaninyo kanang kapahulayan. Akong igapadala kanang gisulti ni Joel, nga, ‘Ug unya mahitabo sa katapusang mga adlaw, nagaingon ang Dios, nga igabubo Ko ang Akong Espiritu nganha kaninyo.’ Oh, magapadala Ako kaninyo, ug himoon Ko ang tanang kanasuran, tanang katawhan, sugod sa Jerusalem. . . Akong ipailalum ang kaliwat ni Abraham sa niini nga pakigsaad. Selyohan Ko ang matag usa kanila. Kita n’yo, igabubo Ko ang Akong Espiritu.”

...Ako magapadala sa saad sa akong Amahan nganha kaninyo: apan managpabilin kamo, nga nagakahulogan, paghulat mo sa ciudad, hangtud nga kamo masul-uban sa gahum gikan sa kahitas-an.

⁹⁹ Unsa man ang Espiritu Santo kung ingon-ana? “Gahum gikan sa Kahitas-an!” Dili gahum gikan sa obispo, dili gahum gikan sa iglesia. Apan, “Gahum gikan sa Kahitas-an!”

¹⁰⁰ Sa unsang paagi ba miabot kana nga Gahum? Pinaagi ba sa “pagpasakop sa simbahan”? Ginahagit ko kamo nga buhaton, isulti ang husto. Pinaagi ba sa “pagpamiyembro sa iglesia, sa pagpakiglamano sa magwawali”? Dili, sir. Karon, sa inyong mga Katoliko, “sa pagpagawas ba sa inyong dila ug pagdawat sa unang komunyon”? Dili, sir.

¹⁰¹ Sa unsang paagi ba Kini nagaabot, kang Gahum nga gikan sa Kahitas-an? Magpadayon kita sa pagbasa pa og diyutay. Adto ta sa Mga Buhat 1:8. Nanagtigum na sila niadtong higayona. Nagahisgot sila mahitungod kay Jesus aning panahona, kadtong nanagkatigum sila, ug anakapili na og lain nga mopuli kang Judas. Mga Buhat 1:8.

Apan managdawat kamo sa gahum, sa dihang kini ang Espiritu Santo mokunsad kaninyo:...

Unsa? “Pagnahimo kang miyembro sa Branham Tabernacle”? Dili. “Pagnahimo kang miyembro sa iglesiang Methodist, iglesiang Katoliko, Presbyterian”? Dili ingon niana, sa Biblia. Hinimo lamang sa tawo kana nga doktrina.

“Apan makadawat ka ug Gahum human ka nga nahimong magwawali”? Dili, sir. “Makadawat ka og Gahum human nimo

makuha ang imong Bachelor of Art”? Dili, sir. “Makabaton ka’g . . . Gahum human makuha mo ang imong DD”? Dili, sir. “Makabaton ka og Gahum human ka mabautismohan sa tubig”? Dili, sir. “Makabaton ka’g Gahum human nimo madawat ang unang komunyong”? Dili, sir. Kita n’yo, kana tanan hinimo sa tawo nga mga butang.

¹⁰² Paminawa n’yo kung unsa ang ginaingon sa Biblia, kung unsa ang giingon ni Jesus.

. . . managdawat kamo sa gahum, sa diha nga ang Espiritu Santo mokunsad kaninyo: (unsa man ang Espiritu Santo? ang Gahum) unya, paghuman niini, mamahimo kamong mga saksi ko. . . (“Kamong dose lang, saksi kamo kanako diha sa Jerusalem”) . . . kamo mamahimong mga saksi sa ako sa Jerusalem, . . . Judea, . . . Samaria, ug nga hangtud didto sa kinatumyan sa yuta. (Nga wala pa maabot.)

Ug sa nakasulti siya niini, . . . ug sa nakasulti siya niini, sa nagatan-aw sila kaniya, gibayaw siya sa itaas didto sa panganod ug midawat. . . nga misalipod sa ilang mga mata.

¹⁰³ Karon ablihi pa-tuo kining panid, ug tan-awa n’yo kining mga panagna nga nagakatuman.

Ug sa miabut na ang adlaw sa Pentecostes, nanagtigum sila sa usa. . . nanagtigum sa paghiusa ang tanan sa usa ka dapit.

“Ug sa kalit lang misulod ang pastor ug . . .”? Nawala ko sa atong ginabasa dinhi, di ba? “Sa kalit lang ang pari miadto sa altar”? Dili.

Ug sa kalit miabut ang usa ka lanog. . .

Dili usa ka tinumo-tumo lang; atua Kini mismo, usa ka lanog.

“Usa ka ministro nga nagapadulong sa pultahan”? “Ang pari nga nagapahigayon og komunyong, nagapadulong ngadto sa balaang dapit”? Dili, walay ingon niana.

. . . miabut ang usa ka lanog gikan sa langit. . . (Dili kasikas sa usa ka tiil) . . . miabut ang usa ka lanog gikan sa langit ingon. . . sa usa ka makusog nga hangin nga mihuyop (Oh, grabe! Whew! . . . ? . . .) . . . ug gipuno niya ang tibook nga balay diin didto sila managlingkod.

¹⁰⁴ Unsa man ang Espiritu Santo? Dinhi sila nagakuha og Gahum. Dinhi sila ginapaabot nga maghulat; ania ang nahitabo human nila kini gibuhat. Gitagna na ang tanan, sugod sa Genesis hangtud niadtong panahona, sugod kang Abraham hangtud niadtong panahona; nga Kini moabot, ug sa unsang paagi Kini moabot, ug ang mga resulta niini. Unsa man Kini? Gisaad ngadto sa Iglesia, ngadto sa mga magtotoo.

. . . ug gipuno niya ang tibook nga balay diin didto sila managlingkod.

Ug kanila nanagpadayag ang mga dila nga ingon . . . sa kalayo, nga nabahinbahin ug nagtungtung sa ibabaw sa tagsatagsa kanila.

Ug nangapuno silang tanan sa Espiritu Santo, ug misugod sila pagsulti sa nagkalainlaing mga sinultihan, ingon sa gihatag kanila sa Espiritu Santo aron ikasulti.

Karon ato kanang pagahisgotan, Biyernes sa gabii. Biyaan sa' nato kana diha, kita n'yo.

¹⁰⁵ Unsa Kini? Usa Kini ka saad ngadto sa Iglesia, hingpit nga saad. Oo.

¹⁰⁶ Bueno, karon atong susihon, human nga sila nangapuno, sila giselyohan hangtud kanus-a? [Ang kongregasyon nagaingon, "Hangtud sa adlaw sa pagtubos."—Ed.]

Pipila man dinhi ang aduna na'y Espiritu Santo? Tan-awon daw nato inyong mga kamot. Adunay mas daghang nakabaton sa Espiritu Santo kay sa wala. Gusto namo nga mamahimo kang usa kanamo, igsoong lalake, igsoong babaye. Kung imong masabtan kung unsa Kini, Kini. . . Kini ang Espiritu sa Dios nga nagapuyo diha kanimo, aron mamuhat sa mga buhat nga iya sa Dios.

Sa diha nga ginapadala sa Dios ang Iyang Espiritu ngadto sa bisan kinsa sa Iyang mga alagad, sa bisan kinsa sa Iyang mga propeta, sa bisan kinsa sa Iyang mga magtutudlo, sa bisan kinsa sa Iyang mga apostoles, sila kanunay'ng ginasalikway sa kalibutan. Giisip sila nga mga buang-buang, sa matag kapanahonan. Bisin sa dihang mibarog si Pablo kaniadto sa atubangan ni Agripa, siya miingon, "Sa paagi nga gitawag og erehiya. . ." Unsa man ang *erehiya*? "Buang-buang." "Sa paagi nga ilang gitawag nga buang-buang, usa ka pundok sa mga buangbuang, sa ingon nianang paagi ko ginasimba ang Dios sa among mga ginikanan." Malipayon ako nga makaingon nga ako usa kanila. Oo, sir. Husto kana. Malipayon gyud ko nga makaingon nga ako usa kanila.

¹⁰⁷ Karon, human nga mikunsad kanila kining Espiritu Santo, Kini ang nagpahimo kanila nga mapinalanggaon na sa usa'g usa hangtud nga silang tanan nag-ambitay sa tanang mga butang nga ilang gihuptan. Husto ba kana? Grabe, grabe, grabeng pagpakig-fellowship! Atong ginakanta kana nga awit usahay, "Oh, what fellowship! Oh, what joy Divine!" Mao kana. Dili igsapayan kanila, dili igsapayan kanila kung ang—ang adlaw misidlak man o wala. Wala sila mangayo og mabulakon nga higdaanan sa kaharuhay.

"Bueno, akong dawaton ang Espiritu Santo," ingon sa pipila ka mga tawo kanako, "Mr. Branham, kung makagarantiya ka

kanako nga ako mamahimong milyonaryo, kung makagarantiya ka kanako nga makakita og atabay'ng petrolyo, ug kon makakita ko'g mga minahan sa bulawan, ug ako—Ako . . .” Kita n'yo, may mga tawo nagatudlo niana, ug sila nagatudlo ug bakak. Wala gisaad sa Dios kanang mga butanga.

¹⁰⁸ Ang tawo nga makadawat sa Espiritu Santo dili niya igsapayan kon magpakilimos man siya aron makakaon, o dili. Wala'y kalainan kana kaniya. Siya usa ka tawong pa-Langit na. Dili siya . . . Dili siya nahigtan dinhi, sa bisan unsa. Husto kana. Dili siya nabalaka. May moari man, mobiya, unsa ma'y mahitabo. Ginapasagdan lang niya sila nga manaway, ug magbiaybiay. Mawala man imo kadunggan, unsa ma'y imong kabalak-an? Paingon ka na man sa Himaya! Alleluyah! Nagatutok ka lang kay Cristo, ug ikaw siguradong paingon na. Dili mo igsapayan kung unsa ma'y igasulti sa kalibutan.

Ingon niana ang Espiritu Santo. Usa Kini ka Gahum, usa Kini ka selyo, usa Kini ka Maglilipay, Usa Kini ka Manlalaban, Usa Kini ka ilhanan. Oh, grabe! Kini ang kasigurohan nga gidawat ka na sa Dios.

Pila na ba ka oras ang akong nakuha? Naa na lang ko'y walo ka minuto. Bueno. Mahimo nga . . . Daghan pa ko'g mga Kasulatan dinhi. Siguro dili ko na kini mahisgotan, apan atong—atong sulayan kutob sa atong mahimo.

¹⁰⁹ Karon, human ang usa ka tawo mapuno sa Espiritu Santo, posible ba nga ang mga paglutos ug ingon-anang mga butang maoy magpahimo kaniya nga mobalik ug . . . Bueno, dili siya mawala, tungod kay anak gihapon siya sa Dios, sa kanunay, tungod kay naselyohan ka na hangtud kanus-a? [Ang kongregasyon nagaingon, “Hangtud sa adlaw sa pagtubos.”—Ed.] Husto kana. Mao kana ang giingon sa Biblia.

¹¹⁰ Karon, human nga ang mga tinun-an kaniadto gipangkulata, gibugalbugalan, gibiyabiayan, ug tanan na, naghunahuna sila nga panahon na nga magtapok usá sila sa makadiyut. Ablihan nato sa—sa Mga Buhat sa ika-4 nga kapitulo, ug tan-awa kung kanus-a sila . . . unsay nahitabo. Karon kini alang kaninyo nga mga tawong nakabaton na Niini. Mga Buhat sa ika-4 nga kapitulo.

Niadtong panahona, gilatos na si Pedro ug si Juan, ug gibalhog na sa bilanggoan, tungod sa pagpang-ayo, tungod sa pagpahigayon og panerbisyo sa pagpang-ayo didto sa ganghaan sa simbahan. Pila man ang nasayod niana? Adunay usa ka tawo nga naghigda didto, usa ka bakol. Dili siya makalakaw; ingon niana na siya sulod sa kwarenta ka tuig. Ug si Pedro milabay. Ug siya miingon . . . mitunol sa iyang kopa, aron magkuha og butang nga isulod sa iyang kopa, nga makaon.

Ug naipakita ni Pedro nga usa siya ka magwawali nga puno sa Espiritu Santo, wala gyud siya'y kuwarta. Miingon siya—siya

miingon, “Wala ako’y salapi ug bulawan.” Kita n’yo, wala siya nabalaka niana. Pero siya usa ka—usa ka tawong pa-Langit. Oh, hinaut unta nga adunay pa kita’y panahon para maghisgot niana sa makadiyut, kita n’yo. Siya usa ka tawong pa-Langit. Aduna na siya’y kahupayan. Anaa kaniya ang Espiritu. Anaa kaniya ang Gahum. Mipadayon siya sa paglakaw ug miingon, “Salapi ug bulawan wala ako, apan kung unsa lang ang naa kanako maoy ihatag ko kanimo.”

Sigurado miingon ang tawo, “Unsa lang diay ang anaa kanimo, sir?”

“Naa ko’y pagtoo. Aduna ko’y nabatongan sa akong kasingkasing nga nagsugod mga napulo pa lang ka adlaw ang milabay. Atua ako niadtong higayona sa taas nga lawak, ug sa kalit lang, ang tanang saad nga gihimo sa Dios. . . Naglakaw ako uban ni Jesus Cristo sulod sa tulo ug tunga ka tuig. Nangisda ako uban Kaniya, bisan sa pagbira sa isda. Gibuhat nako kining lain-laing mga butang. Ug nakita ko Siya nga nag-ayo sa mga masakiton. Ako. . . Kanunay Niyang ginaingon kanako, ‘Ang Amahan ania Kanako; apan pag Ako mobiya na, Siya mosulod kanimo.’ Pero, dili nako masabtan kana. Apan Siya miingon, ‘Karon, wala Ko nagapaabot nga masabtan nimo kini.’”

Dili ninyo masabtan kining mga butanga; apan dawata lang ang mga niini. Dili ko pa masabtan kini. Ug ayaw ko ingna nga nasabtan ninyo; tungod kay, dili ninyo masabtan. Kita n’yo? Busa, dili ko Kini masabtan, dili ko Kini mapasabot; apan, ang butang lang nga akong nahibaloan, nadawat ko Kini.

“Bueno, bueno,” moingon mo, “dili man kana siyentipikanhon.” Oh, sigurado.

¹¹¹ Tan-awa n’yo kanang mga suga. Sa dihang nadiskubre kini ni Benjamin Franklin, siya miingon, “Nakuha na nako.” Wala pa niya hingsayran kung unsa ang iyang nakuha, apan nakuha niya kini. Gusto kong adunay makasulti kanako kung unsa gayud ang elektrisidad. Wala sila kabalo kung unsa kini, apan naa na kita niini. Amen. Husto kana. Walay tawo nga nahibalo kon unsa gyud ang elektrisidad. Mahimo nila kining gamiton, mahimo nila kanang pasigaon, padilaabon, ug pabuhaton. Apan kini—ginahimo kini pinaagi sa mga generator, duha ka buok niini nga dungan ginapaandar nga sama *niana*. Kini ang nagahimo niana, ug kana ra ang ilang nahibaloan. Mohatag kini og kahayag, ug kini adunay elektrisidad nga anaa niini.

¹¹² Ug ingon ana pud ang Espiritu sa Dios. Pagmokuha ka’g usa ka, nga maoy ikaw, ug ang usa pa mao ang Dios; ug dungan mo silang paandaron nga sama *niana*, aduna kini’y pagabuhaton kanimo. Husto kana. Magahatag kini og Kahayag. Magahatag kini og Elektrisidad. Wala ka kabalo kung unsa Kini, ug dili gyud ka makabalo kung unsa Kini, apan mahibalo ka kung nakabaton

ka Niini. Mao ra kana'y sigurado. Ug para Kini kanimo. Imo kini. Kini ang kasigurohan. Husto kana.

Unsa ma'y ginapakita sa *maong* kahayag? Adunay kasigurohan. Kini mao ang kahayag.

Karon matikdi kini. Bueno, wala ka mahibalo kung unsa Kini.

¹¹³ Apan kadtong mga tawo miingon, “Bueno,” sila . . . gisulti nila ang usa ra ka butang nga ilang nahibaloan, “kabalo kami nga sila mga ignorante.” Dugang pa nga mga “buangbuang,” nakita n'yo, sama sa giingon sa Aleman nga ingon niana kono siya. Kita n'yo? Miingon, “Sila mga wala hibangkaagan ug mga wala nakaeskuwela. Apan nakauban nila kadtong Mangingisda, kadtong Karpintero didto, nga gitawag og Jesus, kana ang masulti ko kaninyo, tungod kay ginabuhat nila ang samang mga butang nga Iyang ginabuhat.”

¹¹⁴ Ingon niana ang Espiritu Santo, si Jesus nga nagapuyo sa usa ka ignorante nga mangingisda, sa usa ka panday, o unsa man, sa ignoranteng magwawali, sa bisan unsa man. Usa ka tawo nga gusto mamahimong ignorante sa mga butang nga iya sa kalibutan, ug ginatugotan si Jesus nga mosulod kaniya, ang Espiritu sa Dios, ang selyo, ang Maglilipay. Wala siya nanumbaling sa kadunganan; ang gusto lang niya mao ang Dios.

¹¹⁵ Sa dihang nagpahimutang ang Dios og kahan-ayan, Siya miingon, “Kamong tanan nga mga Levihanon, gitawag ko kamo ug gihimo Ko nga mga sacerdote. Ug ang tanan ninyong mga igsoon, ang uban kanila, ang napulog-duha ka banay ug . . . ang ubang onse ka banay mobayad kaninyo og ikapulo.”

“Kung, aduna ka'y siyam ka taksanan nga mansanas, ibubo ang usa ka taksanan sa mga Levihanon. Pag imong ipaagi ang imong mga karnero niining—niining dapita, kuhaa ang ikanapulo nga karnero. Dili ko igsapayan kung kini man gamay, o daku, tambok, o luoy, kana'y iya sa mga Levihanon.

“Karon, kamong mga Levihanon, pagmadawat na ninyo kining tanan, maghatag usab kamo ug ikapulo, ngadto sa Ginoo. Maghimo sab kamo ug mga halad-nga-tinabyog, mga halad-nga-binayaw, nagkalainlaing mga halad. Maghatag sab kamo og ikapulo sa Ginoo.”

¹¹⁶ Miingon ang Dios, “Moises, para sa imong bahin, Ako'y imoha.” Oh, grabe! Ingon Niya, “Ako ang imong bahin nga nagahatag og katagbawan.”

Ug ingon niana ang Espiritu Santo sa Iglesia karon. Salapi ug bulawan wala ako, apan aduna ko'y Bahin nga nagahatag og katagbawan. Aleluya! Edukasyon, dili gani ko halos makabasa niini nga Basahon, apan aduna ko'y Bahin nga nagahatag og katagbawan. Maayo kana. Digri sa Pagka-doktor, wala ko ana;

Ph.D's o LD's, o unsa pa man. Apan adunay usa ka butang nga aduna ko, ang Bahin nga nagahatag og katagbawan. Mao kanang bahin nga gusto nako. Kana ang bahin nga gusto sa Dios nga mabatonan nimo. Isalikway ang tanang uban pa niining mga butang, ang tanan nga kabantugan ug ang tanang uban pa, ug ikaw molakaw gikan diha ug magabaton sa Bahin sa Dios nga nagahatag og katagbawan.

¹¹⁷ Tungod kay, kung unsa man ang anaa kanimo dinhi sa yuta, biyaan nimo kini sa dihang mobiya na ka. Apan kung anaa kanimo kanang Bahin nga nagahatag og katagbawan, Iya kang dad-on pataas sa ingon ka sigurado gayud. Kanunay kitang nagakuha og insurance, sa karong panahon, aron ihatag lamang sa embalsamador. Atong kuhaon ang Bahin sa Dios nga nagatahag og katagbawan, ug kuhaon ang Magdala-kanatopaitaas imbes ang embalsamador. Kabalo mo, pareho silang nagatrabaho.

¹¹⁸ Karon atong tan-awon.

...sa gibuhian na sila, nangadto sila sa ilang kaugalingong mga kauban,...

Dili balik sa mga sacerdote. Kita n'yo, nagapakita kadto nga nadawat nila Kini. Wala na sila mobalik pag-usab niadtong karaan, bugnaw, pormal nga butang, wala; mobalik ug moingon, "Karon tan-awa n'yo kung unsa ang ilang gibuhit kanamo!" Wala, wala. Naa na sila'y kaugalingong kauban. Aduna lamang og mga usa ka dosena kanila didto, apan igo na kadto nga pundok, ingon niana ra ka daghan nga mga tawo.

...sa gibuhian na sila,...

Human sila gipanglatos ug gihulga, miingon ang mga sacerdote, "Kung magbautismo pa gani kamo pag-usab sa Ngalan ni Jesus!" O, oh, ang pasabot ko... Bueno, husto kana. Kita n'yo? "Kung magawali gani kamo pag-usab sa Ngalan ni Jesus, bisan unsa pa'y inyong buhaton, dakpon kamo namo!"

¹¹⁹ Miingon sila, "Whew, kuyaw kana nga hulga. Moadto sa ta sa uban pa natong mga kaigsoonan." Oh, mao kana ang paagi. Sa panaghiusa adunay gahum. Sa panaghiusa adunay kusog. miingon, "Adto sa ta sa uban pa natong mga kaigsoonan ug hibaloong kung unsa ang puede natong buhaton."

¹²⁰ Karon silang tanan nagtipon ug nag-istoryahanay sa lainlain nilang mga kasinatian.

...sa gibuhian na sila, nangadto sila sa ilang kaugalingong mga kauban, ug ilang gisugilon ang tanan nga giingon kanila sa mga pangulong sacerdote ug sa mga anciano.

Ug sa pagpakadungog na nila niini, nanagdungan sila sa pagpatugbaw sa ilang mga tingog ngadto sa Dios,...

Karon paminawa n'yo ang ilang gisulti. Bantayi siya, bantayi sila, wala sila mibalik ug miingon, "O . . ." laing butang mahitungod sa, "Oh Ginoo, pasayloa ko . . ." Wala. Mga luwas na sila. Napuno sila sa Espiritu. Aduna sila'y Kinabuhing Walay Katapusan.

. . . gipatugbaw nila ilang mga tingog . . . nga nanagdungan, ug nanag-ingon, Ginoo, ikaw mao ang Dios, . . .

Amen! Ganahan ko niana, Igsoong Palmer. Ganahan ko ana.

. . . ikaw mao ang Dios (kita nahibalo niana) nga nagbuhat sa mga langit, ug sa yuta, ug sa dagat, ug sa tanan nga anaa kanila:

Nga pinaagi sa baba sa imong ulipon nga si David . . . nag-ingon, . . .

¹²¹ Karon tan-awa, mobalik kamo, ug moingon, "Karon, dili kami usa . . ." Karon mogawas kamo didto ug moingon, "Bueno, karon, Ginoo, kadiyut lang. Gibiaybiay man ko nila pag-ayo!" Wala ba diay Siya nag-ingon nga buhatan kana kanila sa mga tawo?

"Ang tanan nga nagtinguha sa pagkinabuhi nga diosnon diha kang Cristo Jesus pagalutoson gayud."

"Bueno, abi nimo, miingon man gud ang akong amo nga pagmasakpan kono niya . . ." Wala ba diay sila nag-ingon nga isulti nila kana? "Bueno, kabalo mo, ila man gud ko gिकासuhan niadtong miaging adlaw, tungod Niini."

¹²² Wala ba diay Siya nag-ingon, "Dad-on kamo atubangan sa mga hari ug sa mga namunoan, tungod sa Akong Ngalan. Ayaw kamo'g kabalaka kung unsa ang inyong igasulti, kay dili kamo mao ang magasulti"? Nakita ko kana nga nahitabo kagahapon. "Ang Balaang Espiritu kini nga nagapuyo diha kaninyo; Siya ang mohimo sa pagsulti." Kita n'yo, "Siya." Husto kana. Oo. "Ayaw kamo'g kabalaka kung unsay inyong igasulti."

Ginoo, pinaagi sa . . . Nga pinaagi sa imong . . . sa baba sa imong ulipon nga si David nga nag-ingon, Nganong nagalungotlungot ang mga pagano, ug ang mga katawohan nagapamalandong sa usa ka mga hunahuna nga kawang?

Nanindog ang mga hari sa yuta, ug nanag-ipon sa tingub ang mga punoan . . . batok sa Ginoo, ug batok sa iyang Cristo.

. . . Sa pagkatinuod, Ginoo, batok sa imong balaan nga sulugoon nga si Jesus, nga mao ang imong gidihogan, si Herodes ug si Poncio Pilato, uban sa mga Gentil, ug sa mga katawhan sa Israel, . . . nagtigom niini nga siyudad,

Sa pagbuhat sa tanan nga gituyo sa imong kamot ug sa imong pagbulot-an, sa wala pa mahitabo.

Oh, grabe! Ganahan ko ana. “Ginoo, ginabuhat lang nila ang mismong butang sumala sa Imong giingon nga ilang buhaton.” Unsay giingon sa Biblia? “Sa katapusang mga adlaw, moabot ang mga mayubiton; mga gahig-ulo, hambugiro, mahigugmaon sa mga kalingawan labi kay sa paghigugma sa Dios; dili malukmay, tigbutangbutang, dili mapugnganon, walay gugma sa maayo; nga nagabaton sa dagway sa pagka-diosnon, apan nanagdumili . . .” Wala sila sukad nakaadto didto ug nakadawat sa Gahum: “. . .sa dihang ang Balaang Espiritu mokunsad kaninyo.” “Nga nagabaton sa dagway sa pagka-diosnon, apan nanagdumili sila sa gahum niini: magpahilayo ka usab gikan niini kanila.” Mao kana ang Espiritu Santo. Kita n’yo?

. . . unsa ang *buut* . . . nga *mahitabo*.

. . . *karon, Ginoo, tan-awa ang ilang mga hulga: ug— ug ihatag sa imong mga ulipon, ang bug-os nga kaisug sa pagsulti namo sa imong pulong,*

Oh, ganahan ko niana! Tangtanga kanang bukobuko pangmanok, ug ilisi kana og usa ka tinuod nga dugukan. Karon matikdi n’yo dinhi.

. . . *sa pagsulti sa imong mga pulong,*

Samtang igatuy-od mo ang imong kamot sa pag-ayo; . . .

Oh, igsoon! Ang demonyo dili mamatay, apan ang Espiritu Santo dili usab mamatay. Kita n’yo?

. . . *igatuy-od mo ang imong kamot sa pag-ayo; . . . aron nga pagabuhaton ang mga ilhanan ug mga katingalahan pinaagi sa ngalan sa imong balaang Ulipon nga si Jesus.*

Nakita n’yo na kung unsa ang ilang ginahisgotan, dili ba? Ginabuhat nila ang mao rang butang sa karon, apan wala kana’y nahatag og unsa man nga kaayohan.

Ug sa nakaampo na sila, nauyog ang dapit nga ginatiguman nila; ug nangapuno silang tanan sa Espiritu Santo, ug . . . nanagsulti sa pulong sa Dios nga adunay kaisug.

¹²³ Whew! Grabe! Aduna sila’y naangkon sa dihang misaka sila didto, dili ba? Ang saad nag-ingon nga mao kana ang Espiritu Santo, hatagan ka og kaisog, hatagan ka og kahupayan, aron ikaw maselyohan, hatagan ka og ilhanan. Oh, grabe!

¹²⁴ Paminaw. Oh, kung aduna lang unta kita’y oras, puede pa natong hisgotan ang mahitungod kang Felipe ngadto sa mga Samarianhon. Diha sa Mga Buhat 8:14; kamong tanan nga nagasulat niini. Nakadawat sila og dakung kalipay, nakabaton sila og dagkung mga pagpang-ayo, ug nabautismohan sila sa Ngalan ni Jesus Cristo. Apan nagpaadto sila sa Jerusalem, aron sa pagkuha kang Pedro; mianha si Pedro ug iya silang

gipandongan sa mga kamot, ug ilang nadawat ang Balaang Espiritu. Mga Buhat 8:14.

¹²⁵ Ang mga Gentil, adunay usa nga ginganla'g Cornelio. Maayo kaayo siya nga tawo, nagabayad siya og ikapulo, nagtukod og mga sinagoga alang sa katawohan, gitahud ang Dios, may kahadlok sa Dios; usa ka maayong tawo, maayong Presbyterian, Methodist, Baptist, o unsa pa, kita n'yo, usa ka maayo kaayo nga tawo. Apan usa niadto ka adlaw, ang Dios miingon, "Siya usa ka maayong tawo; mao nga Ako siyang ipatambong sa usa ka panagtigum. Akong ipadala ang Akong magwawali dinhi ug sultihan siya mahitungod Niini." Oo.

Busa nakakita si Cornelio og usa ka panan-awon, nga nag-ingon, "Adto ka sa Jopa, ug makaplagaan nimo didto ang usa ka tawo nga ginganla'g Simon, nga magpapanit. Ug adunay usa, si Simon Pedro, didto. Paanhia siya dinhi; sultihan ka niya sa pamaagi, tungod kay nabatonan niya ang usa ka butang."

¹²⁶ Ug samtang nagatindog si Pedro didto. . . Atua si Cornelio nga simbahon unta ang maong magwawali. Siya. . . Apan si Pedro miingon, "Tumindog ka. Ako'y tawo ra nga sama nimo."

"Ug sa nagasulti pa si Pedro niining mga Pulonga," kung giunsa nila pagbalik, sa sinugdanan sa. . . Sama sa mga butang nga akong ginahisgotan, kung giunsa ang pagsaad sa Dios sa pagbubo sa Espiritu Santo. "Sa nagasulti pa siya niining mga Pulonga, mikunsad kanila ang Espiritu Santo." Whew! Oo. Ingon niana ang Espiritu Santo, nga alang Kini kanila. Oo. "Ug silang tanan napuno sa Espiritu Santo."

¹²⁷ Karon matikdi n'yo diha sa Mga Taga-Efeso, aduna didto og usa ka igsoon nga Baptist. Una usa siya ka abogado, maalamon, intelihenteng tawo, nasayod mismo sa balaod; bantugang tawo, iskolar. Usa ka adlaw nabasa niya ang Biblia, ug nakita niya nga adunay moabot nga usa ka gitawag nga Mesiyas. Ug sa diha nga nabasa niya kana, aba, siya nagsugod sa pagkadungog mahitungod niini nga Jesus, ug siya miingon, "Kumbinsido ako. Ug ako'ng dayag nga ginasugid ang akong pagtoo nga si Jesus mao gyud ang Cristo, ang Anak sa Dios." Usa siya ka tinuod nga Baptist. Ania siya nga nagaingon "Ako'ng ginapahayag sa publiko nga si Jesus mao si Cristo." Madasigon kaayo siya nga gibuhad kadto nga gitawag siya sa Dios ngadto sa ministerio. Ang Dios sa kanunay makigsulti gayud sa usa ka matitud-anon nga kasingkasing.

¹²⁸ Ug aduna kaniadto og usa ka kabus nga tigbuhad og balongbalong nga ginganla'g Aquila ug Priscila, nga magtiayon. Tighimo sila'g mga balongbalong. Ang ika-18 nga kapitulo sa Mga Buhat ang nagasulti kaninyo niini. Sila, mga higala ni Pablo. Ilang nadawat ang Espiritu Santo ilalum sa mga kamot ni Pablo ug tungod sa iyang pagpanudlo.

Nakadungog sila nga adunay usa ka rebaybal didto, mao nga miadto sila. Mga napulo o dose ra ang nanambong niini. Busa miadto siya didto aron susihon kini, ug nadungog niya kining magwawali nga nagawali, namatikdan ni Aquila ang pagkasinsero sa iyang kasingkasing. Ingon siya, “Kabalo mo, nagatoo gyud ko nga maminaw siya sa Kamatuoran.”

Busa pagkahuman sa panerbisyo, gitawag niya si Apollos didto sa luyo sa balongbalong, ug miingon siya, “Tan-awa, aduna kita’y usa ka igsoong lalaki nga Judio nga ingon-ani lang kataas, ug mora’g sungo sa agila ang ilong, ug, apan pagmoanhi siya, igapanudlo niya kanimo ang Pulong sa Dios, sa klaro kaayong paagi.” Bueno, wala magdugay. . .

¹²⁹ Nabilanggo na si Pablo niadtong panahona. Makalilisang nga dapit alang sa usa ka modernistikong magwawali, dili ba? Pero nabilanggo gyud siya, ug gitugot kadto sa Ginoo nga mabilanggo siya didto. Busa human nga miabot ang makusog nga linog, nga mipukan sa bilanggoan, iyang gidala ang magbabantay sa bilanggoan uban sa tibuok panimalay niini ug iyang gibautismohan silang tanan, sa Ngalan sa Ginoong Jesus, ug siya mihawa dayon, ug miadto na didto.

Ug bag-ohay pa lang ni Pablo gihinginlan ang yawa gikan sa usa ka gamay, nga babaye didto nga nagapanagna og mga kapalaran. Ug, didto, may mga tawo nga nakapanapi tungod sa maong babaye, busa gibutyag ni Pablo ang ilang pagpangilad, maong gibalhog siya sa bilanggoan tungod niini. Ug gipukan sa Ginoo ang bilanggoan, kay aduna man Siya og daghang mga tawo didto nga kinahanglan makadungog sa Kamatuoran. Dili ninyo mahimong gapuson ang Pulong sa Dios. Adunay . . . Bisan unsa pa, dili ninyo mahimo. Dili gyud ninyo kini mahimo.

¹³⁰ Busa miadto siya didto kung asa kining tawhana. Ug si Aquila ug Priscila, tingali aduna sila’y dala nga mga sandwich. Ug dihadiha dayon human nga nakaon na ang mga sandwich, miingon, “Moadto ta sa rebaybal.”

Naglingkod si Pablo didto ug gihawiran ang iyang gamay nga kupo, ug naminaw niining Baptist nga magwawali nga nagawali.

Miingon siya, “Maayo kana, kanang imong giwali, apan adunay dugang pa Niini.” miingon siya, “Gusto kong mangutana kanimo, Dr. Apollos. Nadawat mo na ba ang Espiritu Santo sukad nga mitoo ka?”

“Oh,” mitubag siya, “wala mi kabalo kung aduna ba og ingon niana. Unsay buut mo ipasabot, sa ‘ang Espiritu Santo’? Mga Baptist kami.”

Miingon, “Giunsa mo diay pagkahibalo nga Baptist ka?”
Kita n’yo?

“Bueno, nabautismohan man kami. Ang bautismo lamang ni Juan ang among nahibaloan.”

Ingon siya, “Nagbautismo lamang siya ngadto sa paghinulsol, nga nagaingon ‘toohan ninyo Siya nga magaabot,’ nga mao si Jesus Cristo.”

Ug sa pagkadungog ni Apollos niini, nagpabautismo sila pag-usab, sa Ngalan na ni Jesus Cristo. Ug si Pablo mipandong sa iyang mga kamot diha kanila, ug ang Espiritu Santo mikunsad kanila, ug nanagsulti sila og mga laing sinultihan ug nanagpropesiya. Kay giingon man, “Ang si bisan kinsa.”

¹³¹ Bueno, karon, unsaon nato pagbuhat niini? Naa ko’y isulti ninyo, ug ako. . . Ato nang tapuson, tungod kay, kini, gisulti na nako sa inyo nga paulion ta mo’g sayo. Nahibaloan n’yo na kung unsa ang Espiritu Santo. Para sa katapusang Kasulatan para karong gabhiona. . . Naa pa unta ko’y daghan dinhi, apan kinahanglan na natong laktawan kana. Atong ablihan ang Unang Mga Taga-Corinto 12. Ug unya atong basahon kini, ug dayon atong—ato nang tapuson. Bueno. Unang Mga Taga-Corinto, ang ika-12 nga kapitulo.

Pila kaninyo ang nagatoo sa pagtulon-an ni San Pablo? Oo! Nag-ingon siya, diha sa Mga Taga-Galacia 1:8, “Kung ang usa ka Manulonda magtudlo og bisan unsa nga lahi, ipatunglo siya,” unsa pa kaha ang magwawali. “Bisan ang usa ka Manulonda gikan sa Langit manaog ug magtudlo og bisan unsa nga lahi, ipatunglo siya.” Kita n’yo, ayaw kamo paghilambigit niini.

¹³² Karon matikdi kini, Unang Mga Taga-Corinto 12. Pila—pila ang nahibalo nga kita kinahanglan nga anaa kang Cristo aron mahiapil sa pagkabanhaw, tungod ang Iyang Lawas ra ang gisaad sa Dios nga banhawon? Wala na’y ubang paagi. Wala na’y laing paagi, kung anaa ka sa gawas ni Cristo.

Motan-aw ka man *dinhi* ug motoo Kaniya, moingon, “Oo, nagatoo ako Kaniya. Siya ang Anak sa Dios.” Maayo kana, akong igsoon, andam ako nga makiglamano kanimo pag-isulti nimo kana. “Nagatoo ako Kaniya. Igasugid ko nga Siya ang akong Manluluwas.” Maayo kana, apan wala ka gihapon Kaniya. “Ako makiglamano sa magwawali. Isugid ko ang akong mga sala.” Bisan niana wala ka gihapon Kaniya.

¹³³ Karon bantayi, tan-awa kung unsa ang giingon ni Pablo, kung unsa ang paagi nga makasulod kang Cristo. Unsaon pag-ila kanimo isip usa ka sirkunsisyon? Si Abraham, naghatag sila ug ilhanan. Paminawa kini karon, Unang Mga Taga-Corinto, ika-12 nga kapitulo, ug magsugod kita sa ika-12 nga bersekulo.

Kay maingon nga ang lawas usa, ug may daghan nga mga bahin, ug ang tanang. . . mga bahin sa lawas, sanglit daghan, usa lamang ka lawas: mao man usab si Cristo. (Dili nga nabahin-bahin. “Usa ra!”)

Paminaw. “Kay pinaagi sa usa ka iglesia”? Pila ang nagabasa sunod nako? “Pinaagi sa usa ka paglamano”? “Pinaagi sa usa ka tubig”? Dili. Sayop kung ingon-ana.

“Pinaagi sa usa ka Espiritu!” Kapital ba kini? Nan ang, “Espiritu Santo,” kana. Kita n’yo?

...kitang tanan gibautismohan diha sa usa ka Espiritu, aron mausa ka lawas, bisan mga Judio kun mga Greciahanon, bisan mga ulipon, kun mga dili-ulipon; ug kitang tanan gipainum sa usa ka Espiritu.

¹³⁴ Ang Lawas ni Cristo usa ka Espiritu, diin ang matag miyembro, sugod niadtong Pentecostes hangtud niining panahona, nagainom sa mao rang bag-ong Bino, sa mao rang Espiritu Santo, nga nagadala og mao rang mga resulta. Unsaon nato pagbuhat niini? “Pinaagi sa usa ka Espiritu.”

Kini ang abli nga pultahan sa Dios, ang Espiritu Santo. Unsa Kini? Kini ang abli nga pultahan sa Dios. Usa kini ka ilhanan. Usa Kini ka selyo. Usa Kini ka Maglilipay. Usa Kini ka Manlalaban. Usa Kini ka kasigurohan. Kini ang kapahulayan. Kini kalinaw. Kini pagkamaayo. Kini ang pagkaayo. Kini ang Kinabuhi. Kini—Kini ang abli nga pultahan sa Dios paingon niining tanang mga butanga. Kini ang abli nga pultahan sa Dios paingon kang Cristo, nga adunay. . .

Gipamatud-an sa Dios kaniadto nga Iyang gibanhaw si Jesus gikan sa mga patay, ug ang mga nangamatay diha kang Cristo dad-on sa Dios uban Kaniya sa pagkabanhaw. “Ayaw ninyo pagpasub-a ang Espiritu Santo nga diha kaniya gipatikan kamo ngadto kang Cristo hangtud sa adlaw sa inyong pagtubos.” Whew! Pila kaninyo ang nagatoo niini?

¹³⁵ Unsa man si Cristo? Unsa man ang Espiritu Santo? Dili kini usa ka butang nga angay kataw-an sa mga tawo. Hinoon ginakataw-anan Kini sa mga tawo; apan dili gayud, alang sa magtotoo.

Para sa dili magtotoo! Kung aduna lang unta ko’y mga duha o tulo pa ka semana, Gusto kong hisgotan kini ugma sa gabii ug isulti kaninyo kung unsa Kini sa dili magtotoo. Hatagi ko’g kahigayonan sa paghisgot, sa makadiyut lang. Kini usa ka kataw-anan. Kini usa ka lit-ag. Kini usa ka babag. Kamatayon kini. Kini ang Eternal nga pagkahimulag gikan sa Dios. Dili na ako makahunahuna pa og mga butang kung unsa gyud Kini para sa dili magtotoo!

¹³⁶ Hinumdumi, ang samang ulan nga gibiyabiay sa dili magtotoo, mao ra sab ang ulan nga nagluwas kang Noe ug sa iyang pamilya. Kita n’yo? Ang mao ra nga Espiritu, Espiritu Santo nga gibiyabiay ug ginatawag sa mga tawo nga “buangbuang, usa ka pundok sa mga buangbuang, Kini usa ka kabuang,” Mao pud Kini nga butang ang Mosagkaw sa Iglesia ug magalalin Niini sa katapusang mga adlaw; nga magadala usab

og paghukom ngadto sa dili magtotoo. Husto kana. Mao kana ang Espiritu Santo.

¹³⁷ Bulahan sila . . . Tugoti ko nga isulti kini, sa kamatinuuron sa akong kasingkasing. Bulahan ang mga gigutom ug giuhaw Niini, kay sila pagabusgon.

¹³⁸ Ugma sa gabii atong hisgotan kung sa unsang paagi, kung unsa ang buhaton Niini pagmoabot na Kini.

¹³⁹ Karon, pila man dinhi ang gustong makadawat sa Espiritu Santo, ug gusto magpaampo, aron makita ang Kahayag?

Kabalo na mo “kung unsa Kini”.

Bueno, ugma sa gabii, atong hisgotan, “kung unsay ginabuhat Niini.”

¹⁴⁰ Ug dayon sa sunod nga gabii, mao ang, “unsaon pagdawat Niini.” Dayon magatawag kami ug tudloan ang mga tawo, ug pasudlon sila sa mga lawak ug ipapabilin sila dinha, bisan kung kinahanglan pa hangtud Pasko, husto kana, hangtud nga moanha gyud kanila ang Balaang Espiritu. Atong duolon Kini sa matarung nga paagi, Biblikanhong pundasyon. Atong duolon Kini ug ato Kining dawaton ingon nga gisaad Kini sa Dios, ug sama sa pagkunsad Niini sa sinugdanan. Sa ingon nianang paagi nato kining buhaton dinhi. Ako . . . Wala’y diperensya kung unsa ma’y isulti ni kinsa man, kami . . .

Ang Pulong sa Dios mao . . . ang pinakalabaw sa akong kasingkasing. Husto kana. Ug gusto ko kanang gitagana na sa Dios alang kanako. Kung adunay uban pa, ablihi ang Langit, Ginoo, tungod ang akong—ang akong kasingkasing abli alang niini. Husto kana.

¹⁴¹ Pila ang gusto Niini? Karon ipataas ang inyong kamot, ingna, “Iampo ako.” Karon, samtang anaa kamo dinha, nga gipataas ang inyong mga kamot.

Langitnong Amahan, dugay na kaming nanudlo. Apan ania karon ang Imong Espiritu. Adunay mga kamot nga gipataas karon. Ug nasayod na sila kung unsa Kini, nasayod sila kung unsa ang kahulogan sa Balaang Espiritu. Nagapangamuyo ako, Dios, nga sa dili pa kining panagtigum matapos, nga ang matag kamot dinhi maipataas tungod nga ila na Kining nadawat. Itugot kini, Ginoo.

¹⁴² Nagaampo kami alang kanila. Nangamuyo kami Kanimo nga panalanginan Mo sila, ug ihatag kanila ang gitinguha sa ilang kasingkasing. Tan-awa ang ilang mga kamot, Ginoo. Gihigugma Ka nila. Gusto nila Kini. Nasayod sila nga dili sila makaadto . . . Ugma sa gabii, kung tabangan ko Nimo, Ginoo, mapamatud-an namo kini diha sa Kasulatan nga dili gayud sila makauban sa Pagsakgaw kung wala Kini. Busa nagaampo ako, Amahan, nga Imong hatagan sila og kagutom ug kauhaw, aron sila pagabusgon. Ako silang ginapresentar Kanimo karon,

Amahan. Ug, ihatag kini nga mga panalangin, ingon nga among ginapangayo kini sa Ngalan ni Jesus. Amen.

I love Him, I love Him
Because He first loved me
And purchased my salvation
On Calvary's tree.

¹⁴³ Buut kong isulti kini sa dili pa kita mokanta pag-usab. Gusto kong makighimamat sa usa ka pundok sa mga ministro sa lawak dinhi, Biyernes sa gabii, sa dili pa magsugod ang panerbisyo, kita n'yo, Biyernes sa gabii. Akong . . .

Nakita n'yo ba kung unsa ang akong gipaningkamotan nga buhaton? Aron ipakita kung unsa Kini, unsaon pagduol Niini ug kung unsaon ang pagtahud; aron dili kamo nagaduol nga buta, nga gapangapkap lang. Mao kana ang hinungdan nga wala ko mangutana niini karong gabhiona. Gusto kong mahibaloan ninyo mismo kung unsa Kini. Nga Kini usa ka saad. Kini usa ka selyo. Kini ang Maglilipay. Ug uban pa.

Dayon, ugma sa gabii ug sa sunod nga gabii, sugdan nato ang pagduol, sugod niana, hangtud nga moabot Kini. Dili ko igsapayan kung bisan unsa pa kadugay; magpabilin kita sa hangtud. Limpyohi ang inyong kasingkasing. Dili gyud Niya Kini ibubo sa mahugaw nga kasingkasing. Pagpakatul-id, pag-andam, ug ihatag Niya kini.

I love Him, I love Him
Ipataas nato ang atong mga kamot karon.
Because He first loved me
And purchased my salvation
On Calvary's tree.

Ang pastor bag-o lang miingon, ug uyon usab kita, nga ugma sa gabii magsugod kita sa alas siete imbes sa alas siete-traynta. Ug aron mapapauli ko kamo sa alas otso-traynta imbes sa alas nuebe-traynta. Sa alas siete trayn- . . . Sa alas siete, ugma sa gabii, magsugod na ang kantahan sa maong panerbisyo. Magsugod ko sa akong Mensahe sa alas siete-traynta.

I love Him,
Atong ipagawas ang atong mga panyo ug iwarawara ngadto Kaniya.

I love Him
Ayaw sunda kanang pormal nga uso karon!
Because He first loved me
And purchased my salvation
On Calvary's tree.

Sige, ang inyong pastor na, Igsoong Neville.



UNSA MAN ANG ESPIRITU SANTO? CEB59-1216

(What Is The Holy Ghost?)

ANG SERYE MAHITUNGOD SA ESPIRITU SANTO

Kining Mensahe ni Igsoong William Marrion Branham, una giwali sa Ingles niadtong Miyerkules sa gabii, Disyembre 16, 1959, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org